

Miti qizecne

ilec

fuyne papia



MOORE COLLEGE LIBRARY

Presented by

From the library of

.....A. Capell.....

238.41 MIT


Moore College
Library

MOORE THEOLOGICAL COLLEGE LIBRARY



3 2042 00134593 7

**Miti qizecne
ilec
fugne papia**



1946
Lutheran Mission Finschhafen
Finschhafen
Territory of New Guinea

Printed in U. S. A.

*Moore College
Library*

Dâŋ zâŋene bilickekicne

A k a d â ŋ

1. Akadâŋ 1.
 1. Nâŋâc wofuŋ bocjaha kiŋaŋ qajale jumbeneŋ
 2. Anutuzi Judâŋic wiac ejalewec' sâc ijaha nâŋâc
2. Akadâŋ 2. [enâlewec
 1. Anutu alaŋ bacnehuc zâŋeticne mupene sâcke-
 2. Ele aŋacnâpoha zâŋeticne munzepeneŋ [ocmu
 3. Zâŋe sisipilic ilec dâŋ
3. Akadâŋ 3.
 1. Gie bahuc juku Sondac ŋepene sâckeocmu
 2. Sahaczisawa sondac mi ŋezo
4. Akadâŋ 4.
 1. Nengocmamac bubiaŋte sâsecjopazo
 2. Wahakicnezi fekicne japele mic leŋkenzepeneŋ
 3. Mitio juhuc nalumotec bâtiŋjopanzenepeneŋ
5. Akadâŋ 5.
 1. Sahackopec zika
 2. Maŋzi zika
 3. Sahac qaqaisoc
6. Akadâŋ 6.
 1. Sahaczi bebehec ee
 2. Maŋzi bebehec ee
 3. Mitio babac ezo
 4. Ijowenâŋzi jujule dâŋ
7. Akadâŋ 7.
 1. Losonŋon
 2. Fiuc tâtâc
 3. Bâbâsifuc
8. Akadâŋ 8.
 1. Micnâŋec sonaŋkenzepeneŋ
 2. Dâŋte sâctili eengopenepeneŋ
 3. Bulec lunezi qafeŋnâpome dâŋko sâqoleengopenepeneŋ

9. Akadâŋ 9 â 10.

1. Sâqocne i maŋzi fuŋkeengopeneŋ
2. Wiac fuŋne fuŋne ilec andac fokac
3. Maŋnâŋec biapkeocte Wofuŋ Jesuzi mâleŋko

10. Akadâŋ botâŋne.

[wahawec]

1. Anutu e zoqachec, aalichec alicne
2. Okacnele fuŋne jajahec
3. Aakicdâŋ māmâc muwec

*

*

*

Manasiŋdâŋ

11. Dâŋ 1.

1. Moc e Anutu manasiŋkeocmu e ele ecneha juocmu
2. Anutu manasiŋkehuc juhuc wemocko lâpeckezo
3. Anutu e fuŋ moc
4. Sambâŋte dâŋ
5. Mâleŋte dâŋ

12. Manasiŋdâŋ 2.

1. Anutu e tiŋnelune â Satâŋ e sâqocnelune
2. Ţiczi bâbâpiaŋ mi ezo
3. Wofuŋ e motecticne lâeme wahawec
4. Jesu e kiŋ talaocte wahawec
5. Satâŋzi hafecnâpowec
6. Jesule soczi kitâcnâpome sambâŋte bige embeŋ
7. Jesu e sâc moc jume lâsi ecnembiŋ
8. Jesuzi nâŋâcnele elâ hâmowecte lunâŋec ewec
9. Jesuzi hâlâcko huwec
10. Jesu e fahalelâ sahacone bacbâtikic ewec
11. Jesu e fahalelâ izia mi sambâŋko fewec
12. Jesu e sambâŋko felâ mocwâc tâpililune ewec
13. Juku lisie wahazokac

[jukac]

13. Manasiŋdâŋ 3.

1. Tilimâlo e Jesuzi gie bawec ilec soŋaŋ
2. Zâŋeticne hawaliticnele mâcne, gieticnele mukicne
3. Mâlo e biapkenapte â sanapkenapte giene
4. Mâlohec juhuc wiac epene biapkeocmu
5. Mâlo e docko bâninipelâ wahaekac
6. Mesiale kikefupfâc bâtumapnâpome tili moc elâ
7. Sâqocne bâbâtâmile fokac

[juŋgopeneŋ]

8. Hâmockonec fafahale

9. Jujusanapte dân

*

*

*

14. Nunumule dân.

1. Nunumu i qâqâtacte nakafe

2. Nunumu i lili

3. Maykopec â sahackopec wiacte numuzo

4. Nunumu hehesic

Nunumusâko

15. Sambân mamacnâpec.

1. Wofup e mamacnâpec

2. Nâpâc nalumotecfâcticne

16. Gole zâpe tili fozejec

1. Qanân Anutule mulâ zâhec nâpe nâpâcnele muzo

2. Wofupte zâpe miczi kosa mupene â juju kosa
jupene sâqoleocmu

17. Gole sambân miti fuafâlezejec.

1. Miti nâpâcnao fuahâmozejec

2. Miti han bazejec

18. Sambânko gole miclelep fokac, ipucjaha
mâlepko nâgelao fuazejec

1. Sambânko miclelep apac fokac

2. Nâpâc japele sâc enzepenep

3. Anutule dân i biapne â tipne

19. Go mipecgac nânânâpec nâlezemec

1. Nânâ i lunele manasuhuc banâc ezo

2. Gie bapene mâlili fuame sahac mumutep mi ezo

3. Nânâ i zâpesâko mukicne

20. Kiptofanâpec behezemec, nâpe ipucjaha
âgofâcnâpec japele kiptofa behenapmu

1. Kipnâpecte fupne sâcne mi manaengopenep

2. Mitizi mapnâpec batamaeme sâqocnenâpec
honemanac enapmu

3. Djic japele kiptofa behepene Wofupzi nâpâcne
ipucjaha beheocmu

21. Eesâicko mi lâecnâpozemec
1. Eesâic fupne fupne fokac
2. Eesâicko fupnenâpēc tanipkeekac
3. Eesâicko sanapkenapte mukicne
4. Eesâiczi sipilicnâpozacte numuzo
22. Sâqocnaonec bâhocnâpozemec
1. Sâqocnezi sâfâ ipucne bohotaenâpoekac
2. Jesuzi sâqocnaonec batalacnâpoekac
3. Sambâpko ila sâqocne fupne fupne alietac eocmu
23. Go Wofup fâlinehâcne, go tâpili â tata-
maclune, jumeyzi juzokie.
* * *
24. Mitio pâle dâp.
1. Opâzi Mâlole doc
2. Mâlole pepe hewânepkepene mapnâpecko huocmu
3. Opâ luahuc Mâlöhec epene fupne tâtâc tanipke-
4. Wofup manasipkehuc miti opâ luazo [ocmu
5. Miti opâ luahuc mahec eegopenep
6. Miti opâ lualâ etalakopac mi muzo
7. Nalumotec jape Jesule bipêfâc enzepiepêwâc
8. Nêpgoc mamaczi japelao gie bahapene miti-
opâzi fâlinehec eocmu
* * *
25. Pafetiwâle dâp
1. Wofupte melâfâc
2. Wiac sonne i polop â waiyzi fonkewec
3. Qâqâtâcnâpecte tiwâ lâewec
4. Pafetiwâ i hâmocticnele fâline
5. Zâzâfic qâlicnele soc
6. Ele manasuhuc pafetiwâ nâzo
26. Sambâp te ki
1. Sâqocne mumufua
2. Mumutâmile

Akadâŋ.

1) Akadâŋ 1.

Noni Wofuŋ gole Anutu, go nole maio
bawe me qayŋgec wiac moc mi bajuzemec.

1. Nâŋâc wofuŋ bocjaha kiyay qajale jumbeney. Wofuŋnâŋec moc zâŋene ŋosa. Ilec elâ giesâko bajumbeney â becŋowi gapecmâc nâjumbeney â ŋokac bulec-sâko ejale jumbeney. Ŋosanâŋectehâcne manapene fefene ewec. Eme ilechâcne motecfâcnâŋec Wofuŋte maŋfuŋko mi lâccjopahuc ŋosale maŋfuŋko gulucjopa jumbeney. Elâ ŋosa i wiac fâline mâcne, i mâc ŋiczi bulec ekicne elâ bulec wiac moc kiyay qacnekicne.

Wofuŋnâŋec moc zâŋene bawe. Nâŋâc hâmokicne jajele manapene juŋufâle â mamanaŋfâle â tâpililune embiŋ. Eme bawezi hae â gienâŋec soŋaykezejec â nânâ-qowi bâfuanâlezejec â wiac muŋfuanâlezejec, iŋuc muhuc bâzi guluckejale jumbeney â zâŋelunŋko boleŋ taha bajale jumbeney. Elâ bawe jaje kicnâponzicipiŋte â aleŋ enâlenzicipiŋte â bacnâpo wisenzicipiŋte â nânânâŋec ŋeulunkenzicipiŋte alay wemo afecne bajale jumbeney. Iŋuc epene bawezi wofuŋnâŋec eme kiyay mâletec qacne jumbeney. I mutucnâŋecte iŋuc ejumbeney. Hâmokicne jaje wemocko iŋuc me iŋuc enâleniŋmu. Jaje Wofuŋzi soŋayjopaha juŋgopieŋ â mititâmilic hâmoeygopieŋ jaje kâpâcwâlu bacjopame ŋeeygopieŋ.

Elâ Wofuŋnâŋec moc zâŋene qayŋgec. Qayŋgec bapene wiac fuasawec â fuabiay eocmu muhuc jambuŋ â seloŋ wiac mâletec bâfuasâqolembey. Itâmilic wiac moc mi ejumbeney. Iŋuc ehuc Wofuŋ tâpililune âkehockembey. Elâ isawa mâcne, wiac sâqoleocte sâwec â ŋic sipilickeniŋte hafec i mâmâc bâfuambeyte Sataŋ ewâc âkehockembey. Mutucnâŋecte bulec fuŋne fuŋne bâfualâ hâpohuc domambey. Ehuc wiac omanele manapene hâhâwicne ewec â

wiac lacnele manapene fâline ewec. Jambuj bajumben izi wiac bâfuanâleme muzac ine mâleŋ gâcnao ȳic hapetac juŋfâlehapie mâleŋnâŋecko wiac fusumalâ fozac. Iȳuc ine mi fuawec. Nâŋâc hapetac â gegecdodoc elâ jumben. I Wofuȳ fâline lâpeckehuc dâȳticne qikiȳnembente iȳuc emben. Eki mezi gie bahuc wiac bâfuanapȳe muhame nâŋâc e sâckehuc miczi wiac mupene fuazeȳec, bulec iȳuc mujumbenen.

2. Anutuzi Judaȳic wiac ejalewec sâc ijaha nâŋâc enâlewec. Jape Aigita mâleŋko julaku Anutule nikecjopame Falaole manapie fefene eme hâhâwic bacnembiȳ. Elâ Falao e wofuȳ biapȳne mâcne. E Judaȳic sipilicjopaocte giene bawec. Ilec Judaȳic jape boc sâqolelâ kibusâqoc bâfualâ Anutule mocwâc manasuhuc muwâwâsic ecnembiȳ. Eme eki manalâ Falaole meonec batalacjopalâ hâwec bâbâloȳko ȳezicjopalâ micne bajaleme laku Sinai-tikio fisipie jaza muwec: Noni Wofuȳ gole Anutu. Eki Wofuȳ ejaleha jape ȳicfâcticne elâ juniȳte muwec.

Nâŋâcnao sâc ijaha fuawec. Nâŋâc Satapzi sipilicnâpocte eatucnâpome ȳosabulec â bawebulec â qapȳgebulec ameckehuc juȳu sâqocne jujumbenen. Eme hafecte hâhâwic â zikale hâhâwic â bawele hâhâwic izi kinacnâpowec. Mâleŋ gâcnao ȳic qâpuc julambiȳ jape nemufâcjȳic alaȳ bajale jumbien. Ehuc japele maio wiac kosa epene nâponiȳmu muhuc lepicne gâcne ȳeȳkelâ jumbiȳ. Â nâŋâc ine nemule moc mi hâwicnâpo juȳec â mâleȳfuȳ ewâc alaȳ mi bacne jumbenen. Ilec boc qâsolielâ Wofuȳ fâline lâpeckepene wiac omanezi wofuȳnâȳec eme kiȳap qacne jumbenen.

Iȳuc juhapene Wofuȳ e buulucticnele Satapȳe meonec batalacnâpolâ ȳicfâcticne bacnâpolâ ziȳuc nâzâwec: Noni Wofuȳ gole Anutu, go no alaȳ banalezemec â no kiȳap qanalezemec. Inehâcne Wofuȳ fâline mocjaha jukac, Anutuhâcne. Eki sambâȳ â mâleȳ ilec Wofuȳ, ele femicne moc mi jukac. Eme nâŋâc elao qohotahuc junȳepenen. Lâpeckenapȳmu eme mocwâc mutuc enapȳmu. Mutuc elâ wiac omanele mocwâc manapene hâhâwicne â tâpilihec eocmu. Eme dameȳ ziȳuczia ȳic gâcne Anutu behelâ

zamaŋ â qanġec wiac ġâcne ameckeengopieŋ. Nâġâc iġucnezi Wofuŋ fâline behelâ bulec wiac mocwâc heqâlelâ mamakâc enaŋmu. Ehame Satanġi laucnâpomê ele ġie lepiecne bahuc sâqolesanaŋkenaŋmu.

* * *

2) Akadâj 2.

Wofunġe Anutu ele zâġe mi sipilicke-
zemec.

1. Anutu alaj bacuchuc zâġeticne mupene sâc-keocmu. Nâġâc ġic mocte manapene fefene eme zâġeticne kosa mi munajmu, zolaŋko me bulecko zâġeticne munajte hâwicnâpooemu. Eme fekicnejâmbâŋ ĵukac, zâġe-ne Anutu. Nâġâc ine hehesic â ġiġhec. Eme iġucnezi ele maio lumehuc zâġeticne mupene sâc-keocmu. Ĵic ġâcnezi ine mupepec ehuc zâġeticne muengopieŋ. I Anutule manapie omane eme iġuc eengopieŋ. Iġucnezi ĵuku fuġneticne wenijuc honenzonġopieŋ?

2. Ele aġacnâpoha zâġeticne munzepeneŋ. Nalumotec mocko buc ĵuhuc neggocmamac zâġe manalâ zelienijmu. Â babafic mâleŋ wiwicko ĵuhuc qaġazujepicte zâġe me soŋaŋ âġojepicte zâġe manalâwâc bujeġic biay-keocmu. Eme nâġâc Anutule zâġe mumanac elâ iġucjaha aġacnâpozejec. E mamacnâġeczzi honesoŋaŋ enâleekac, ehuc wiac bocjaha tahacnâpoekac. Ilec ele enâleha zâġeticne munzepeneŋ.

3. Zâġe sisipilic ilec dâj. Gae nunumu i alaj bacnehuc mi eengopeneŋ â ele enâlehawâc mi eengopeneŋ. Maġnâġec foha miczisawa epene zolaŋ â eatuc eekac. Ĵic mocte zâġe zolaŋko muhuc eatuckepene maname ġâpâ-leocmu. Eme wemocte Anutule muġgopeneŋ: E mi maname sâqoleekac. Ehuc gae i maġnâġec elea domaha mi heengopeneŋ â nunumu i ele manasuhuc mi muengopeneŋ â Akadâj â manasiġdâj i iġucjaha mâc micġipiczi bulec ehuc muengopeneŋ, ehuc Anutule zâġe mupene omane eekac.

Â moc ine bulec ehuc Anutule zâġe sipilickeenggo-

penej. Ine sâqocne balâ hesonkehuc mupene jic jaye dâj-nâjec manapie jâmbomac eocte zijuc muengopenej: No Anutule maio musanapkekopac. Ijuc ehuc Anutule zâjezi sâqocnenâjec tapa baengopenej.

Elâ moc ine Anutule zâje mupene sâwec eekac, ine keczijuc muengopenej: Anutuzi tungume hâlâcko huze-mec. I â dâj gâcne Anutule zâjehec bâtulelâ jic sâwec-jopaengopenej.

Nâjâc Wofupje zâje mupene zolan me eatuc me sâqoc-nele tapa me sâwec mi ezejec. Ijuc eme zâje sisipilic fuaocmu. Nâjâc qâpucko jicjokac gâcne jajele zâje mi muhuc supsup qajumbenej. Eme wemocte Anutule zâje kosa ehuc munajmu? Nâjâc lune mutenkehuc â dâje âzâcnehac â gae nunumu ecnehuc zâjene mupene biag-keocmu.

*

*

*

3) Akadâj. 3.

Sondac e tili moc, go ilec manasuzemec.

1. Gie bahuc juku sondac jepene sâckeocmu.

Anutu ejahac fupne ijuc nâwotuwec. Wiac baku bâfâlelâ sondac jewec. Gie i Adaj Edej mâlejko juha mucnekic-newâc. Elâ mi sâqolehame giezi afecne â ajacne ewec. Zâhec ine jemâcne â zâichec ewec. Anutu e sâc keczijuc muwec: Giebapa 6 â sondac 1. Papua nâjâc manapene qacqâlisic eekac. Eme gâcnezi giebapa 1 gie bâpâlâckelâ sondac 6 jeeengopiej. Qâpucko fupne mi manahuc kosa juwalekicne. Josa me gaewowo me zika fuame damejzola gie hetalalâ mâc jujumbenej. Elâ isawâ mâcne, wâcwiac omane homba wemo afecne jekicne. Eme mitio sondac giebapa ilec bâbâsifuc bocjaha foekacwâc. Gâcnezi gieba-pasâc ojoj julaku sondac bembekeme miti lâpeckelâ gie-jejic baengopiej. Â gâcnezi lâlâwiñ damejko sondac fup-keengopiej. Eme fupne zijuc fokac: Anutule mâsi bâsifuc-kelâ sipilickenajmu ine sâcne mi junajmu. Eme ilechâcne nâjâcnao gieie tatakic â mitile tatakic i mâmâc foekac. Moc e giebapane giebapane ojoj jūhame sondac maickeme

maname ayaçmâc eocmu. Â moc e gie bahuç juku ine sondac ñehuc ayaçkeocmu. Eme iñucnezi sambânko felâ hombañsâko ñehuc jume biankeocmu.

2. Sahaczisawa sondac mi ñezo. Ñic gâcne jaje sondac maickeme gie omane i beheengopieñ â ñifec mañkopec gie ine mi baengopieñ. Gâcnezi opâkâteo la jueñgopieñ â gâcnezi hao foengopieñ. Â qañqañ jaelao motec julaengopieñ ine tucnezi sâqocne banĩte giebapao quñkelâ sondacko baengopieñ. Eme sondaczi moc i qâoma dameñ eekac â moc i sâqocne bazo dameñ eekac. Anutu eki ine ilec manasuhuc sondac mi qikiñnenâlewec. Giebapao wiac omane le boc manasueñgopeneñ. Eme sondac maickeme maññâñec qâzucke emasay enañte Anutuzi muwec. Ilec sondacko mitile, tumaññezo â gae nunumu ezo â mitipapia wosezo. Giebapao wiac kosazi maññâñec fâlewahae-kacte sondacko mocwâc Anutulao sâsepene fezejec. Moc e iñuc mi ehuc sondactâmilic juocmu me mâc sahaczi sondac ñeocmu, e miti qâsifuckefâlelâ Wofuñte nikeckeme ñic qâpuç eocmu.

*

*

*

4) Akadân 4.

Gole mamac â ñeñgoc sâsecjofazemec.

1. Nengocmamac bubiante sâsecjopazo. Nâñâc jajeñtâmilic sâcne mi junzapeñ. Bekâ sâcne mi juhâmoengopieñ. Jaje ñeñgocmamacfâcñeñic basacjopahuc busâqoc manaengopieñ â gâcnezi jaññ basahuc hâmoengopieñ. Eme Wofuñzi ñeñgocmamacfâcñâñec soñaññopaha junâlepie bubiante kiññ qajalenzepeneñ. Jaje gie â jaññ wemo afecne bânâleengopieñ. Eme nâñâc tofa i piticne bazujalenzepeneñ. Ehuc gie le baficjopanzenepeneñ, huc fopie jaññ bajalenzepeneñ, elâ jaje le gâbâ numuhuc junzenepeneñ. Â qâpuç jupie mitibinañ bajalenzepeneñ. Nalumotec gâcne jaje ñicñokac omane jaelao qohotaengopieñ â motec gâcne jaje ñeñgocmamacfâcñeñic beheçjopalâ wokeo wiseengopieñ. Ehame ñeñgocmamac jaje ñicñokacqizec elâ gie le bititiehuc buñâic manaengopieñ. Nengocmamac iñuc

ejalepene Wofunzi maname sâqoleocmu. Eki mâlepko juhuc nengocmamac jahecticne kîpaj qajactehuc juku sokawec. Eme nâpâc e bâjâpezo mulâ sâc ijaha enzepenej.

2. Wahakicnezi fekiecne jajele mic lepkenzepenej. Nalumotec jaje piticne, nengocmamac jaje kâc-gene. Ilec nalumotec jaje nengocmamac â wawalau jajele mic lepkenzepiej. Nengocmamac jajelao funkezo. Jajele mic lepkehuc sojaj babafic jajele mâmâc lepkezo. Sojaj babafic jajele lepkehuc fekiecnefâcnâpec gâcne jajele lep-kezowâc. Ijuc efekupene Anutulao qatalazejec. Nâpâc mâlepko fekiecnefâcnâpec juengopiej jajele dâj mi lepkenajmu eme Anutule dâj ijucjaha mi lepkenajmu. Wofun e felij wahalij junapte munâlewec. Eme nâpâc mâsi i sipilickepene nâpâcnao wiac sifuckefâleocmu. Sambâpko juengopiej jaje ijucjaha felij wahalij lâecjopakicne. Ilec moc e mâlepko aka i huckehuc weniguc sambâpko feocmu.

3. Mitio juhuc nalumotec bâtinjopanzenepenej. Nalumotec hehesic juhuc wemocko sâsecnâponijmu. Nâpâc nalumotec sahackopec wiacsawa ejalepene wemocko sâckeocmu. Jajele majko sâqocnele ukicne fune fune fokac. Eme i âkezume mapuupichec engipinte sojajjopahuc bâtinjopanzenepenej. Nâpâcne bâbâtij ine wiac jajahecsawa fokac: Hahane â zika. Iwâc ejalezo. Elâ ilecsawa elâ mi tijkenijmu. Nâpâc hehesic jupie hefâlecjopalâ mitio up â fune jazanzepenej, jajele elâ numunzepenej. Elâ jajele maio tijne junzepenej. Tijne jujunâpeczi sâcne bâtinjopaocmu. Mitinâpeczi batamaecjopame jaje wemocko hâhâwictâmilic wiac kosa enâlenijmu. Jajele maio ine hehesic boc jupene jaje nâpâcnele manapie sâqoleha wemocko sâcne sâsecnâponijmu. Eme jaje â nâpâc mâmâc qâsolienajmu. Nâpâc nalumotec jajele lu jabane, Wofun eki lujepic fâline. Eme ele enijte honesoaj â jazabâtij ejalenzepenej.

*

*

*

5) Akadân 5.

Go zika mi qazemec.

1. **Sahackopec zika.** Zika izi tâtâc foekac, Papua nâpâchâcne zikaqâqâ. Mâleŋ gâcnao ila ŋiczi gie fuŋne fuŋne bâfualâ bahapie nâpâc zila iŋucjaha giesâkojâmbân bajumbeneŋ, elâ wiacnâpec fuaocte mâcne, ŋiczi alictac enapte ilec zikagie bakicne. Lâsifâcnâpec jopamiziepene wama fuame sâcne junzepeneŋ, iŋuc muhuc qâqâmiziec ekupene mâleŋnâpecko tuhucsâko fuawec. Eme ilec ŋiclo-locsâko fokac. Lunâpeczi zika sakalenâlewec. Eme nâpâc ele mi manasuhuc ŋicfâcne boc sipilicjopambeŋ.

Eme mitio zika tâtâc qanaŋte qunkelâ kia qafeŋkepene ŋicŋokac zika kâpâcwâlu kosa ejaleocte maŋnâpec domakac. Â motec lângeŋne jaŋe wiac sâqocne gumecjopapie hâmosipilic eniŋte muengopieŋ. I zikagie sasawa. Nâpâc Anutule alaŋ bahuc zikagie mi behenaŋmu eme alictac enaŋmu. Mitio zika i wiac gâgâpâcne.

Elâ zika moc fokac i qâlicsisipilic. Moc i bumaŋko sipilicjopaengopeneneŋ, moc i fuapie sâcne mi soŋaŋjopaengopenenŋte boc hâmoengopieŋ. Elâ ŋic ŋokac kâcŋene tucne iŋucjaha jaŋuŋ basahuc hâmoengopieŋ. Eme kâcŋenezi hâhâmo â qâliczi hâhâmo, iŋuc boc fome weni jaŋezi tucnâpec qalâ junaŋmu? Wemocte Anutule dâŋ boc huc-kelâ sâqoleengopeneneŋ?

2. **Maŋzi zika.** Zika fuŋnejâmbâŋticne maŋko fokac. Maŋzihâcne zika fuŋkeengopeneneŋ. Maŋkopec zika zâŋene aalic. Zika izi soŋsoŋ foekac. Ŋic tucne maŋŋeŋicko aalic fuame hesoŋkepaŋkelâ bajuengopieŋ. Juku wiac moczi iockeme aalic batalaengopieŋ. Aalic i zika lepicne. Aalic fome lâlâsi foocmu. Lâlâsi fome sisipilic enaŋmu. Aalichec juhuc wemocko ââgo elâ soŋaŋ babac â babafic â jaŋuŋ babac â dodopec enaŋmu? Aalic manahuc juhapene âgo-fâcnâpec jaŋelao huc hâmoc me sâsâqole me wiac iŋucne moc fuame bubiaŋ mananaŋmu. Wiac iŋucnele bubiaŋ i Satantaonec. Eki sâqolesipilic epene bune biaŋkeekac. Â mamaenâpec eki ine busâqoc manaekac. Zika mâc mi alictac eocmu. Mitizi maŋnâpec bâmâteŋkeocmu â Mâlozi

mapwama banâleocmu eme aalic alictac eocmu. Aalic alictac eme zika iñucjaha alictac eocmu. Ilec aalic fuame mufualâ Mâlo hefâlezo.

3. Sahac qaqaisoc. Âgofâcnâpec japele sahac mi sipilickenzepeney â nâpâcne sahac iñucjaha mi qanze-peney. Sahac qaqale fupne iñucjaha jajahec fokac. Moc izi tâtâc fokac: Bibitua, hâlâcko qaqâ, opâo huhu. Moc ine soñsoñ fokac. Ine gâcnezi huczupu bâfuaniñte giene baengopien me huchec juhuc kosa eengopien. Moc e sahac-ticne sipilickeocmu e Anutule mâsi sipilickeocmu â juju-ticne bâmbembepkeocmu. Eme moc e iñuc elâ lunâpecte maio fualâ wenijuc eocmu?

*

*

*

6) Akadân 6.

Ïowepônân ñohe bebehec mi ezepilec.

1. Sahaczi bebehec ec. I qâpucko mâletec ekicne. Ïokac mamale babacjopa fowecte bacbehec boc ekicne. Eme sahaczi bebehe i mitio mi alictac ewec. Ïokac bebehe boc-jaha fokac. Ïokacte tatakic fuame wokeo wiwise, ñokac puliñ me wicwakoc ecneme bebehe, ñokac e qâpuc, miti mi mamana muhuc qiqikiñ, ñokac e ñokacqizec muhuc susuggiñke, ñokac e sasec kosa ekac muhuc sâsâlocke, i â wiac gâcne i qâpuc mâsi, i mañsanapte iñuc eengopeney. Mitio fupne iñuc mi fokac. Mitio mocjaha julaku hâmocko bebehe isawa fokac. Mitio fupne zijiñuc fokac: Ïokaczi hehesic jume mubâtiñ ecnehuc nunumuo lâlâe, ñokaczi puliñ eme jauñ babacne, ñokaczi ñokacqizec eme sahaczi â mitizi dodopecke, ñokaczi qâpuc jume miti qaqazucne. Ïokac jajelao bahac fuame ñiczi nâpâcne bahacte mañasuhuc akicjopanzepeney. Ïic nâpâc wemocte nâpâcnele manapene tiñne eme ñokac wiac acmâcjaha ejaleengopeney?

2. Mañzi bebehec ec. Sâqocne i mañzi fupkeengopeney. Ïokac bebehe i iñucjaha qanañ mañzi fupkeengopeney. Mañzi bebehec eku zâhec sahaczi bebehec eengopeney. Â moc ine mâc mañzi bebehec â lâlâwiñ hati juhuc

juengopeney. Mañzi yokac gâcne lolocjopa, mañzi japelao sâsâqole, mañzi yokacte tatakic bâbâfua, mañzi wemocko hâmome moc bazepac i mamanasu, me wemocte yokac keci mi bapo mañzi iyuc mumu, i wemo? I mañzi yokac bebehe. Â ñifec yokac japelao sâc ijaha fokac. Jowegonân iyucnezi dâgmumuc hati, qaqatalac hati, qaqaisoc hati, mañ lângeñ hati ehuc junicmu.

3. Mitio babac ezo. Nâñac sahaczi â mañzi bebehec boc eengopeney, ilec fuyne sasecko fokac. Nâñac sasecko babac eengopeney. Ââgole me jauñ babac ezole me gie le â mitile babafic ezole me fuasawec eele babac mi eengopeney. Sasecte manasulâ babac elâ Anutule mâsi sipilickeengopeney. Mitio babac elâ juju ilec fâline kecziyuc fuaekac: Jowegonânzi ââgo juju, moc e hucwic fuacneme busâqoc manalâ ele jauñ aimuñ bapa, sâsâsec ee, nunumu â mitizi dodopec ee, bahac fuame ulucko mumufâsâe, qalic fuapie apace manahuc sahackopec jauñ aimuñ eejale. Eme jowegonân iyucnezi jufenicmusâc apacjekic fuaocmu, jufenicmusâc mañjauñzi fuasawec eocmu, jufehucsâc mañzi zâzâfic sanayne elâ junicmu. Â sasecko babac elâ sasecte giesâko bahuc jupie fâline ziñuc fuaekac: Tatakic, dâñ qiqikiñ, hata kipante manaqâoma, hucwiete honetacqatakic, miti â nunumu hetalalâ juju, sahackopec gie me mañkopec gie mi afeckelâ bapa, loloka hati, qâlic sisipilic, fuasawectâmilic, sisipilic.

4. Jowegonânzi jujule dâñ. Jokac gâcne japehec juju ilec manapene sâqocne fâline eekac â nâñacne yokacfâc sasec kosa eejale, i manapene omane eekac. Hucdodoc ejalebipieha sasec, soczi hecjopaha sasec kiwec-sâkohec juhapie sasec, dameñ mukicne qâsuahuc sasec, zoangiebapasâc sasec, saseczi sasec, eku sahacnâñec â qâqâtâcnâñec sipilickepene mâmâc alictac eekac. Mâlâcjaha sasecte aka piticne fome yokac japehec gâbâ foto i mi ekicne. Zikahafec â qanğec, sowa wiac ilec elâ yokacfic qikiñne jumbieñ. Wemocte mitizi aka henâlebipieha sasecgiesâko baengopeney?

*

*

*

7) Akadâṇ 7.

Go fiuc mi lozemec.

1. **Losonṣon.** Țic gâcne japele wiac sonṣonko loenṣopeney, ine moc i ojonṣte eenṣopeney. Ojon juhuc nânâ â moneṣ mafa basahuc gâcne japele lonâc eenṣopeney. Ilec ojon i fiucte mamac. Gie zoṣac bahuc wiac bâfuaocmuzi fiuc mi loocmu. Țic gâcne jape ine wiac fofojale i fojaleocmu. Elâ ilec mi manapie sâckeme gâcne japele loenṣopieṣ. I sahackopec wiacte andac elâ iṣuc eenṣopieṣ. I qanṣan hao motec julaenṣopieṣ jape laonec tacnezi iṣuc eenṣopieṣ â haenâṣecko Țic gâcne mâmâc. Țic iṣucnezi mankopec wiac ilec manapie jawane eme sahackopec wiac ilec andac elâ fiuc lolâ manṣeṣic bâḡâpâleenṣopieṣ â miti sipilickeenṣopieṣ. Juda iṣuchâcne ewec. Âḡofâcne japele moneṣ fiuc lohuc miti ima qawec. Elâ Jesuzi ecneme mi mumufua moneṣte andac kâcḡene bâfualâ doc bawec.

2. **Fiuc tâtâc.** Ine kecziṣuc fokac. Țic hâmpie hozecebâ wiac jowaclofâlelâ bawiseenṣopeney. Motec wo-keonec fisipie moneṣ mafale zoṣac ejalepene micnenenṣte nâleenṣopieṣ. Âḡofâcnâṣec wiac nâlepie mi tofane bazujaleenṣopeney. Â moc i wiacṣeṣic bajuhapene sifuckeme okacne mi jaleenṣopeney. Bombon jape laonec wiac bajupene nîeck-jopame mi bâbâlisieṣale hati bajuenṣopeney. Moc i jâṣacne mafa â bec bulimakao sâcne mi sonṣanṣopahapene sipilickeenṣopieṣ. Motec hânu gieo ojon juhuc moneṣ mafajṣeṣic fiuc loenṣopieṣ. Moc i Țicṣokac muhâhâwic ejalehuc wiac kâṣḡâc jowacloenṣopeney. I â fiuc tâtâc gâcne wemo afecne fokâc. Eme nâṣâc ilec manapene mi sâḡoleekac. Manâṣec wezimucko qâleme wiac iṣucnele hâwicnâpome behenajmu?

3. **Bâbâsifuc.** Jufusesuc, opâkâte ilec bâbâsifuc. Wiac afecnele fuline bafehuc mumu, wiac fulisâkole moneṣ bawalahuc jajale, naleṣ galeṣ sâctili ee, wiac fuline baja-lenanṣte moneṣ nâlepie sâckoa mi bâbâlisieṣale, bitinṣeṣic-konec â nombânṣeṣickonec qowî qaqâ, i bâbâsifuc sasawa. Bâbâsifuc wemo afecne fokac. Bâbâsifuczi fiuc ekac. Eme moc e Wofuṣzi honemanac enalekac iṣuc muocmu, e fiucte

hâwickeocmu. Â Wofuņ mi manasiņkeocmu eki ine lunezi mi manaocmu â mi honecnuocmu, iņuc muhuc fiuc bâfu-aocmu. Ehuc wiac omane qâqâtâcticne hegâpâleocmu.

* * *

8) Akadâņ 8.

Go micko âkec mi ezemec.

1. Micnâņec soņaņkenzepeneņ. Iņuc mi enaņmu eme dâņko boc sâqolenaņmu. Ehuc micko âkec â qoqolic â gupe â bulec i mâletec ehuc bâbâzâic enaņmu. Gâgâ-pâc nâņâc omadâņ tatakictâmilic muhuc foengopeneņ, omadâņte mâletec enâleme guņ mi fofo muhuc ņehapene ņafe zâņiņkeekac. Hoemaņko ficko ņehuc wiac jajahec eengopeneņ: Guņ â dâņ. Guņ foku fahale dâņ, dâņ eku waha guņ, iņuczi iņuc. Eme ilec nâņâcnao mumusifuc fuasâqoleekac. Hatadâņ â maņkofuadâņ ņondeņnâņecko wemo afecne haņ baekac. Moczi maņjahec ehuc mume moczi manalâ biac mujâmbâņkeocmu. Ijic mocte dâņ manalâ la lune mi wiwiocne kosa jazapene haņ baekac. Ijic moc qolickehuc e gole iņuc mukac mupie manalâ zi-ņuc mi muengopeneņ: Jâmbomac me bulec i mi manatalahuc ņifecne mi muzepac. Mâcne, i biac jâmbomac muhuc dâņ kosa mupene gâpâleekac. Â moc i dâņ manaengopeneņsâcsawa mi muengopeneņ, maņnâņecte zuhuckelâ mupene qâlâņkeekac. Eme ilec dâņ boc sifuckeekac. Iņuc ehuchâcne dâņzi maņ bâbâgâpâlec eengopeneņ. Micnâņec wemocte mi soņaņkeengopeneņ?

2. Dâņte sâctili eengopeneņ. Ine kecziņuc ehuc: Nâņâcne dâņ me bahac fuame mupitiwaengopeneņ â gâcne jaņele fuame musokaengopeneņ. Fuņfuņfâcnâņec â mumutulefâcnâņec jaņele hehesic hesoņkeengopeneņ, eme sifu haņ bame gâcnezi ilec mupie ņepezic eengopeneņ. Ijic ņokac omane jaņele dâņ fuame ine qalatielâ musâqolecjopaengopeneņ. Âgo fâline juhuc muzac iņuc mi enzapeņ, ine dâņte sâc mocjaha enzapeņ, ehuc wiacfâcnâņec me omane hehesicte â bahacte mitio mubâtiņ â tutuc qaqa ejalenzapeņ.

3. Bulec lunezi qafegnâpome dâjko sâqoleegopeney. Nâjâc Wofuŋtao qohotahuc maŋmamanasu-nâjêc elea lâepene foha dâj kosa munzipetge hâwicnâpocmu. Eme wemocko âgofâcnâjêc dâjzi boc bâzâicjopanaŋmu. Wofuŋte Mâlozi maŋnâjêcko gieticne baha wemocko bulec me hehesoŋ me micko âkec me dâj âkesipulâ mumu bâfuanâjmu? Ine dâj tiŋne â wamane â jâmbomac munâjmu. Eme ŋiczi ââgo elâ sâcne junâjmu. Â Wofuŋ lâpeckelâ miti â nunumu betalapene bulec lunezi maŋnâjêcko dâj kosa lâeme afeckelâ mupene bulec â mumusifuc â dâjko sâsâqole mâletec fuaocmu. Eme buleczi âkefâucnâpome lâlâwiŋ fuaocmu.

*

*

*

9) Akadân 9 â 10.

Go ŋic jajele huhule wiac ilec andac mi ezemec.

Go ŋic jajele ŋokac nalumotec me bec wiacte andac mi ezemec.

1. Sâqocne i maŋzi fuŋkeegopeney. Maŋzi sâqocne i nâjâc manapene lacne eekac â Wofuŋzi ine maname fâline eekac. Ilec ziŋuc muwec: Andac mi ezemec. Sâqocne i wiac ukicne iŋucne. Jâchândâj me nânâ kise wiac salapene mâlejmaŋko qâlelâ bâpâj qaekac. Izi bâpâj âkezulâ mâlej maŋkonec wefume muengopeney: Âkezukac. Sâqocnezi ijaha eekac. I maŋnâjêcko fuaekac. Fuame izia qikiŋnepene alictac eocmu. Â qâoma enâjmu ine fuatâcneocmu. Sâqocne i sahaczi mi fuŋkeegopeney. Sahac e mâc maŋte kiŋaŋqaqa. Sâqocne maŋnâjêcko fuame mekike â zâŋehazec â mic jaje maŋ kiŋaŋ qacnehuc sâqocne tâtâcko bâfuanâjmu. Sâqocne i mâc huc iŋucne elâ sahacnâjêcko fome muzac ine hâmocko sahacnâjêc hetalahuc sâqocne mâmâc hetalanzaŋej elâ sambâjko feŋalanzaŋej. Mâcne, sâqocne i maŋnâjêcko fokac, ilec hâcne Anutuzi muwec: Go andac mi ezemec.

2. Wiac fuŋne fuŋne ilec andac fokac. ŋic huhulejêpicte andac: Bolej, monej mafa, lâlic sâqe, qoluc ŋaqi, bec qâto, jufu sesuc. Wiac iŋucnele mâlâcjaha andac

elâ zika boc bakicne. Â mitio wiac ilec andac foekacwâc. Andac ehuc wiac i kângâc jowacloengopeney me fiuc loengopenephâcne. Wiac ilec zâyesâko huhule mukicne. Eme bajunapte enâleme wemocte mi zoqac elâ hulelâ bajuegopeney me? Wemocte mâc gâcnezi bajupie honelâ andac eengopeney? Elâ ilecsawa andac mi eengopeney. Djicjokac nalumotec ilec andac, opon. Bekâ jape mockoneczi bacjopa lalâ bâmec bajalekupie sokapie japele andac elâ dâj fupkeengopeney. Ehuc hehefalic â dâjmunuc mâletec eengopeney. Nâjâcnaonec jic moczi hae mocko la jume ele andac elâ muegopeney. Jâpepie waleoc. Nalu japele andac wemo afecne fokac. Eme ilec jicko lâecjopanapte iiliac elâ dâj mumuc eengopeney. Elâ jiczi jokac omane japele andac ee â jokaczi jic japele andac ee i mapsâc fofâlekac.

3. Maɣnâɣec biapkeocte Wofuj Jesuzi mâleɣko wahawec. Sahacnâɣec biapkeocte mi wahawec. Â sahackopec wiac iwâc mi bawahawec. Eme gâgâpâc nâjâc maɣmutucnâɣecte wiac sahaczi babajune â nânâne ilec manapene fâline eekac. Eme Jesuzi sambâɣkonec wiac bawahawec, i sahacnâɣec lâcnenapte qupkelâ muegopeney: Miti i fâlitâmilic. Wofuj Jesu eki ine maɣnâɣec biapkeocte ilec sambâɣkonec wiac bawahawec. Sahacnâɣec biapkeocte ilec mi wahawec. I jukû mâleɣko huocmu. Â maɣnâɣec biapkeme sambâɣko fenapte ilec Jesuzi miti â tatamac â tâpili â Mâlo bawahawec. Maɣnâɣec biapkeme sâqocne alictac eocmu. Djic tucne jape sahaczi sâqocne bulec bulec beheegopieɣ â maɣzi ine bajuegopieɣ. Eme ilec mitiheɣ mi eegopieɣ. Wofuptao qohotapene ele tâpiliz i nâjâcnao fotâcneme maɣzi andac â saseɣ â jâiɣ i behepene ine sâcne biapkelâ junajmu.

*

*

*

10) Akadân botâpne.

1. Anutu e zoqacheɣ, aalicheɣ alicne. Aalicheɣ julâ muzac okacne fâlo ehuc nâlezac. Ehuc kiɣnâɣec dameɣzola mi bajuzac. Eki ine wopecnâɣec juekac. Wopec juhuc uɣ nâzâekac. Mâlâcjaha Noa juha jumbiɣ japele wopec dameɣ zolicne juwec. Niniwe haeo jumbiɣ japele iɣucjaha

*

wojec juhuc uñ jazawec. Kiñ bajuekac i batalaocte mâcne, mañnâjec bâlisiepe ne beheocte lâeme foekac. Judajic jaje motecticne qapie iñuchâcne ejalewec. Okacne biac mi babazujale jâbuc ejalehame hâmo fâlembiñ. Eme qâlic-fâcjenic fualâ sâc ijaha jupie maname mañ bâbâlisie fufuane mi eme kiñlajqane â qâlicne i mâmâc batalawec. Nâpâc ine Anutuzi wojec jume manapene qâoma enâle-kactinac eekac. Eme mañnâjec mi bâlisiehuc kiñ i qâlic-fâcnâjec hulejaleengopeney. Eme kiñzi kiñ faio fefe fekume Anutu e gosa apafâcnâjec wenijuc ejalezokac?

2. Okacnele fugne jajahec. Moc i hâmo pene pîcsâc jujunâjecte fugne bataniñkehuc wiac enâleekac. Ilec jâbuc mi enâleocmu. I hâmo pene izia enâleocmu. Â qâlicne juhapene okacne mâmâcsâko eenâle ine moc Judajic Jesu gambiñ jaje hâmola elao fisipie okacne ejalewec. Qâlicne jumbiñ jajele wojec juhuc ine akicjopawec. Eme juku qâlicfâcjenic fualâ juhapie ine okacne mâmâcsâko fisijaleme alictac embiñ. Okacne bucbuc ine hâmonaŋmusâc bâfuananŋmu. Â sahachec juhapene mâmâc nânâle ine dameysâc miti ima qahuc jukupene wojec juibieku enâleocmu. Wofuñ e zoqachec. Ilec dâñ muwec, i dodocne mi eocmu.

3. Aakicdâñ mâmâc muwec. Wofuñ e mamacnâjec ilec sipilicnâpoocte mi muekac. Mañnâjec bâlisielâ micticne leñkepene tahacnâpoocte muekac. Eme ilec pîc tucne ele elâ jupie jajele elâ qâlicfâcjenic tahacjopaekac. Abalahapte elâ Judajic wemo afecne tahacjopawec. Dawidile elâ iñucjaha ejalewec. Kâc qenefâcnâjec miti fuame ilec zelisâko bâfuahuc wiac lañqane behembîñ jajele elâ tahacnâpoekacwâc. Elâ tahacsâko â aakicsâko mâlejsâc enâleekac ine motecticnele elâ eekac. Ekiñhâcne sambâñ dopeckeekac. Eme Anutuzi juku dope i qatalame sâkocnele kiñzi kimacnâpome mâlejte damej talazokac.

Manasiṇḍâṇ.

11. Dâṇ 1.

No Anutu mamac manasiṇḍakekopac.

1. Moc e Anutu manasiṇḍkeocmu e ele ecneha juocmu. Maṇmamanasuticne, giebpaticne, tâpiliticne, dameṇticne, moneṇmafaticne, qikiṇneme Anutulea efâleocmu. Anutuhec juocte afeckeocmu. Ele maname mocjaha fefene eocmu â wiac gâcne sasawa wahakicne eocmu. Abalahāṇ e Anutu iṇuchâcne ecnewec. Ele elâ haemâleṇ â âgobago behecjopawec, ele elâ motecticnewâc qikiṇneocte afec-kewec, ele elâ tiṇne â wamane juwec. Â ṇic moczi ine wiac kecziṇuc bâfuaocmu: Qâoma juju, nunumu qiqikiṇ, mitile tatakic, Anutu dâṇge â mumuteṇ mi eecne, mitio wiac mukicne mi afeckelâ ee, kecziṇucnezi Anutu mamac manasiṇḍ-kekopac mume bulesâko eocmu. Iṇucnezi Anutu qâoma ecnekopac mume sâckeocmu.

2. Anutu manasiṇḍkehuc juhuc wemocko lâpec-kezo. I maṇzi elao sanāṇne qohotazo. E mamaclaunâṇec â bâbâfuanâṇec, wiac lonâc banâc eengopeneṇ i elaonec sasawa, eki wiac nâletahac â honesoṇāṇ enâleekac, buafecticne â jaupiticne wemo afecne. Eme nâṇâc ilechâcne Anutu manasiṇḍkenzepeneṇ. Manasiṇḍkehuc junāṇmu eme lâpeckenāṇte manapene qunṇkeocmu. Mo ṇiczi âgoticne wiac lâcnegumec ehuc giele bafickeocmu â jaun ecneocmu i mozi afeckelâ beheocmu? Wiac Anutu behelâ molao qohotazo? E iṇucne moc wena jukac? Moc mi jukac, lâsinâṇec mocjaha. Eme eki mâlâcjaha wiac sâqocne boc gumecnâpawec â mamakâc mâletec enâlewec â sisipilic enāṇte boc qafegnâpawec. Elâ wiac fonâleekac, opâkâte â haemâleṇ â jufusesuc â nânâqowi i lâsinâṇeczi moc mi bâfuanâlewec. I mamacnâṇpectaonec sasawa. Ilec e manasiṇḍkehuc juzo â gâc moc mi hecnezo â qaqatalac pepece i mi ecnezo. Ṇickopac fuṇne ziṇuc fokac: Bomboṇ moczi motecfâcne nânâqowi sâcne mi gumecjopaocmu, moneṇ-mafa sâctili jaleocmu, giele fâlo ejaleme ṇeṇemanatâmilic

banijmu, kâcbijzi mâletec jopasipilic eocmu, huc fopie jaup mi ejaleocmu, ijuc eme motec jape behelâ wisenijmu elâ elao mocwâc lisieniŋte takicjopaocmu. Â motec gâcnezi manalâ ijucjaha hâwicjopame qikiŋnenijmu. Eme nâŋâc sâc ijaha enzepeŋeŋ. Lâsinâŋec dâŋ qikiŋnehuc mamac-nâŋecte mananzepeŋeŋ. E kecziŋuc mi muhuc bâfuac-nâpowec: Jic bâfuacjopape wiac kosa enalehuc wiacnane ima banzepeŋeŋ. Mâcne, elao qohotahuc micne leŋkenapŋte muwec. E manasiŋkejâmbâŋkenapŋmu ine ijuchâcne enapmu. Eme mamasasiŋnâŋeczi fâlinehec ezejec. Mâlâcjaha mamacnâŋecte kâuc bambeŋ. Mipecgac ine locnâpolâ kike-fuŋfâcticne bacnâpowecte manasiŋkehuc junzepeŋeŋ.

3. Anutu e fuŋ moc. Tâpililune mucneengöpeneŋ-hâcne. E jic nâŋâcne sâc mâcne. E fufuatâmilic, neŋgoc-mamactâmilic, sosokatâmilic, lalaŋqaŋketâmilic, hâhâmotâmilic. Fuŋneticne ijuc fokacte dameptâmilic jukac. E damepte maname alictac eekac. Elao laŋqanezi qâlicne â juku fuaocmuzi fuakicnetinac eekac. Anutu e juwalehuc juwecsanap. Sambâŋ â mâleŋ mi fuahame juwec. Anutu e haemâleptâmilicko jukac. Alictacko juwec jukachâcne ine, ilec wiac i mi fuahame juwec. Nâŋâc mâleŋ mocko â hae mocko jueŋgopeneŋ. Â itâmilic ine wemocko junapmu. Hâ-molâ haemâleptâmilicwâc mi junapmu. Â Anutu eki ine ijuc mi eekac. E ijuc elâ mâleŋko mocko juhame muzac mâleŋ mockoneczi etâmilic junzapiŋ. Ilec e mâc wiac sasawa sambâŋ â mâleŋ juŋfâlehuc sâckeekac. Anutu e sâc moc jukacte nâŋâc wemocko fuŋneticne mananapmu. Nâŋâc fuakicnele wiac bâfuakicne ilec fuŋnesawa piticne manaepgopeneŋ. Â mi fufua ele manapene quŋkeekac. Anutu e nâŋâcne sâc muzac fuŋneticne mananzapeŋeŋ.

Tâpililune juêkacte wiacbapaticne sâc moc foekac. Nâŋâc wiac bapene tofanehec eekac, eki ine bame tofane-tâmilicc eekac. Jiczi wiac moc fome lolâ izi wâcwiac baakic eengopeneŋ. Jâc basahuc wemocko fic me sac bazo? Muctâmilic wemocko he me simemeŋ wiac hefuc ezo? Anutu eki ine wiac sasawa sawaonec â alictackonec bawec. Elao wiac sâctâmilic fokac.

4. Sambâŋte dâŋ. Ilec fuŋne jajahec fokac. Sambâŋ

faic honeengopenej, ila Anutuzi zoaḡ â mosa bâpiḡ lâewec. Wiac ihâcne lâelaku wena lâetalawec ine ilec gie baengopieḡzi qaḡeḡne basaengopieḡ. Iḡci sambâḡ honepene bâbâzic eekac. I mâc honepene iḡuc eekac. Fepene ikisiḡke feocmu. Hâwec mecko sambâḡ qaḡeḡne fokac i sâc ijaha eekac, lapene laekac. Elâ sambâḡ moc fokac, mi hohone, ila Anutule aḡelofâc â kikefuḡfâc juengopieḡ. I mi hohonele ila me ila fokac mi manaengopenej. Mitio juku hâmopene qâqâtâcnâḡeczi honelâ bâfuaocmu. Zila mâleḡko wiac fokac, i sahacnâḡecte sâc, sahaczi bajunaḡte ilec. Â sambâḡko hae â wiac ḡekac i qâqâtâcnâḡecte sâc, qâqâtâczi bajunaḡte. Sambâḡ i Anutuzi kâcḡene lâewec. Ilec hâmowalehuc fembiḡ â hâmolahuc fenigmu jaḡe mi fusenigmu.

5. Mâleḡte dâḡ. I ḡic nâḡâcne ḡeḡejuju lâewec. Ehuc wiac bajunaḡte â lonâc enaḡte manasuhuc lâefâlêwec. Opâkâte giehehec, jufumumuc, nânâqowi, jâcbac â wiac ḡâcne ḡâcne bâfuanâlefâlêwec. E wiac mocte mi nikeckewecte wiac mi basaengopenej. Wiac sasawa sâc-koa lâewec, ḡafezoaḡ, sâkzoaḡ â hoemaḡ, fâlone â mâ-mâteḡne. Elâ wiac sasawa soḡaḡkeha moc mi sâqoleekac â mi sifuckeekac.

Wofuḡte fuḡne iḡuc fokacte ḡiczi pepecte â sahacmumuteḡ behelâ ele maio lumelâ juzo. Ehuc e manasiḡkehuc kiḡaḡ qaḡnezo. E behelâ wena lazo? Mâleḡko â sambâḡko wiac fokac i elea sasawa elâ ekizia jufâlêekac. Ilec e behelâ mocko mi la jukacko wisezo mulâ eipienammu. I manahuc maḡmutuc mi ezo.

* * *

12) Manasiḡdâḡ 2.

No Jesu Mesia manasiḡkekopac.

1. Anutu e tiḡnelune â Satāḡ e sâqocnelune.
Anutu e mâlâcjaha wiac sasawa bianḡe lâewec. Ehuc Adaḡ â Ewa bâfuacjofame iḡucjaha bianḡe â maḡqaqac jupic. Bâbâsâqole me bâbâsifu i Anutulao mi fokac. E wiac esifuckeocte me bâsâqoleocte eipieocmu. E tiḡnelune ilec. Â

Satante fupne ine qacqâtikic fokac. Eki wiac etipneocte me embiankeocte eipieocmu. E giene baekac ine wiac sâqoleocte â sifuckeocte. Ilec paladisio ȳicȳokacwâc esâic-jofahuc maȳbâsifuc ejacteme Anutu lâpeckepic.

2. ȳiczi bâbâȳiaȳ mi ezo. Nâȳâc wenac fupne-nâȳec moc manalâ ȳiȳuc munȳapeȳ: Nâȳâc sâqocne. Qâ-pucnâȳecko ȳiȳuc mujumbeneȳ: Nâȳâc biȳagne. Sahackopec â maȳkopec fupne mâmâc kâuc bambeȳ. Eme ilec sahaçwânepsâkohec â imeȳheç n sahaçâsuhec jujumbeneȳ. Ehuc otokomba wiacnâȳec mi zule jumbeneȳ â ficnâȳecko â haezopao jawa fusumalâ fome mi emasapke jumbeneȳ. Â ficnâȳec uupicko bapene ȳejujec. Wiac ipucnele manapene sâckewec. Wiacnâȳec mâteȳkezac â huc bacnâpozac muhuc opâ mi lua jumbeneȳ â wiacnâȳec mi zuleemasap ejumbeneȳ. Eme dameȳ ȳiȳuczia fupne piticne manaengopenenȳko qâpuc jaȳelao lalâ wiac ipucne honemanac elâ mamakâcnâpoekac. Â mâlâcȳaha ine maȳmutucsâko juhuc fupne mi manambeȳ. Eme sahackopec wiac mamakâcnelesawa mi kâuc bambeȳ. Maȳkopec wiac mamakâcne ilec mâmâc kâuc bambeȳ. Ehuc jâjâȳec â sisipilic â nânâc ejumbeneȳ. Wiac Satanȳi maȳkopec â sahackopec afecne bâsâqolecnâpowec me? Eme fupne mananzipeȳtehâcne maȳmutuc bacnâpowec â dapâcko niȳȳiȳnâpowec.

Elâ fupne manalâ muzac i bâbâȳiaȳwâc mi engâȳeȳ. Mo tiȳnezi gâcne bâtinȳopazac â mo biȳagnezi gâcne bâȳiaȳjopazac? Alicne, ȳiczi mâmâc sasawa sâqolekicne. Hucheczi jaȳȳ babac mi eniȳmu. Qȳicicne moczi huchec jaȳȳ bajaleocmu. Fifia mi bapazi opâzâkânȳko hulâ wemocko loloc eniȳmu? Fifia bapa moczi gâcne locjopaocmu. Eme nâȳâc mâmâc sasawa huchec jumbenȳ, mâmâc sasawa fifia mi bambeȳ. Mâmâc sasawa Satante niȳȳiȳko fombeȳ. Ilec wemocko mo bâbâȳiaȳ engapeȳ? Bâbâsâqolec â sisipilic mocȳaha ejumbeneȳ.

3. Wofuȳ e motecticne lâeme wahawec. Wofuȳ e fupnenâȳec ȳiȳuc manawec: Noni ȳic sâqocnaonec mi batalacȳopape sipilickefâleniȳmu. Ipuc mulâ motecticnele mocȳaha maname sâckewec. Ehuc ȳiȳuc âzâcnewec: Goki mâleȳko hulâ ȳic bâȳiaȳjopazemec, ehuc sambâȳhawalige

heunuckelâ tâpili â tatamacge zila lâefâlelâ hulâ ɲic japele sahaç lolâ ɲondenjepicko juzemec. Sambâŋhawaliticnehec wemocko wahalâ sâqocnebapa japele ɲondeŋko juzac, ine tatamacticnezi mâc sipilicjopazac. Eme Anutuhec sâc mocjaha juweczi mâleŋko wahalâ ɲic nâŋâcnehec sâc mocjaha ewec. Eme sâqocnehec fuazacte Mâlozi, Malialao mâsi bame Jesu motec kiweckelâ lowec. Eme e jujufâlezi Maliale bumapko huwec, e tâpililunezi qiene elâ fuawec, e wiac focnefâleweczi, hapetac ewec, e mamanafâlezi qiemapheç ewec. Nâŋâc Jesuzi wiac ewec, i manapene hâhâwicne ezejec. Â Anutu e biapkenanŋte motecticne qikiŋne-nâlewec, ine buafecticnele mutenkenzepeney. Nâŋâc ilec mi wâsickehuc lâsi ecnehapene e buulucticnele iɲuc ewec.

4. Jesu e kiɲ talaocte wahawec. Anutu sâqocne bacnehuc jukicnele kiŋsâko fualâ fowec. Eme Judapic jape kiɲ i talaocte zoanŋe zoanŋe mitiufunŋko qowi hezulikec ejumbieney. Eme qowisocte wemocko talazac. Jape kiŋte nikecŋopame qâoma enziŋiŋte Mosezi jazame iɲuc ehuc jumbieney. Â nâŋâc zila kiɲ batalananŋte zika giesâko bajumbeney. Elâ batalabipiehuc 'qâiŋnembey. Eme kiŋsâkôhâcne i mozi moç batalazac? ɲiczi kiŋheç efâlekicne. Ilec Anutu e ɲiczi kiŋte hâhâmole mume muzac moc ejahacne kiŋte â moc ejahacne kiŋte, iɲuc hâmoku hâmo-fâlenzapeŋ. Â moczi kiŋtâmilic juhuc gâcne japele kiŋte hâhâmo i mi fowec. Eme Anutu e kiɲ bazuocte boleŋbiap mocjaha bajuwec, motecticnehâcne. Wiac gâcne sasawa ilec maname wawahane ewec â motecticnele maname fulisâko ewec. Eme waha kiŋnâŋpecte hâmoocte mucnewec.

5. Satapzi hafecnâpowec. Nâŋâc mâlâcŋaha kosa juhapene hafecbapa jape luc bahuc hafecnâpo jumbieney. Eme Satap eki iɲucŋaha kosa juhapene hafecnâpowec, i sahaçzi hâhâmole mâcne, qâqâtâczi hâhâmole iɲuc enâlewec. Eme mâlâcŋaha boleŋ lâepene lame qeŋqey bâtikienâle jumbieney. Eme lunâŋeczi iɲucŋaha boleŋsâkoticne lâeme wahame lâsinâŋeczi hafecqeyqey bâlisiewec. Nâŋâc mâlâcŋaha qeŋqey i opâzi hemâtenke jumbeney. Â Satapzi qeŋqeynâŋec bajuwec i opâzi mâcne, Jesule soczi heme mâtenkewec. Eme ilec qâqâtâcnâŋec mi hâmoocmu. Mâc

muzac sipillicefâlenzapeŋ.

6. Jesule soczi kitâcnâpome sambânte biŋe embeg. Mâlâcjaha hâlâcte biŋe embeg. Satâŋ e gie bame ele haemâleŋ fuafâlewec. Eme ŋiczi hâlâcko jukicne. Hâmolâ huhu hâlâc ila mâcne, sahachecki juju hâlâc ila jujumbeneŋ. Haemâleŋnâpeczi hâlâc eme dâpâcko juhuc wiac mamakâcne mâletec ejumbeneŋ â sisipilic ehuc nânâc ejumbeneŋ. Hâlâcko kâpâcwâlu bâcnâpokicnele lalac wawalec wemocko enzapeŋ. Âgofâcnâpec honecjopapene lâsi efâlepie hâhâwic babac efâlembeg. Eme Jesutâmilic muzac iŋuc julaku sipilickenzapeŋ. Jesule soczi kitâcnâpowecte ine hâlâc alictac ehame sambânte sâsâcne wiac kecziŋuc fuawec: Wama, tatamâc, bubiaŋ zeli, jaup, micleleŋ, ââgo â jujusanâŋ. Jesu e maŋjaupcicne mo iŋucne, ilec sâqocnebapa nâŋâcnele elâ sambâŋ qikiŋnelâ mâleŋko wahalâ sahacticne qaisockewec. Â mamacnâpeczi nâŋâcnele busâqoc mo iŋucne bajuhuc motecticne qikiŋnenâlewec. Eme dameŋ ziŋuczia moczi Jesu lâpeckesanapkeme e iŋuc me iŋuc ecnehuc bâbâpiaŋkeme wiac moc mi fokac. Wiac mocjaha fowec, i Anutuzi eme talawec. Eme sambânte biŋe ekicnezi weniguc mocwâc hâlâcte biŋe enapmu?

7. Jesu e sâc moc jume lâsi ecnembij. E tiŋnezi hehesic japele ŋondeŋko juwec. Ehuc hehesicjepicte â kiŋjepicte jazame dâŋticne bâutuckembij. Eki wiac epie baficjopahuc mutenjopame muzac âgo ecnenzapiŋ. Â sahackopecsawa dopecjopame muzac ilecwâc manapie sâckezac. Kiŋte â maŋbâbâlisiele jazame ine aalic manacnembij. Jape fuŋnejepic sâcne mi manambij. Ehuc hehesic â kiŋhec juengopeneg mi mumbij. Jape bâzi likepene kiŋ talaekac iŋuc mumbij. Eme jaŋacnele tiŋne muhuc Jesule hehesic mumbij. Â jaŋacnele sanapne muhuc Jesule dodocne mumbij. Eku qambij. Eme Jesu e Judapic japele kiŋtesawa mi hâmwec. Mâleŋne mâleŋne ŋic mâlâc jumbij â zi juŋgopeneg â juku junzongopieŋ kiŋnâpecte elâ hâmwec.

8. Jesuzi nâŋâcnele elâ hâmwecte lunâpec ewec. Eme ilec wiac sasawa ele elâ ezo. Ele elâ biaŋkezo, ele elâ sambâŋko fezo. Nâŋâc ine fuŋne manasifuc-

keengopeney. Ehuc miti mamana â binay bapa â nunumu â mitigie bapa ilec elâ sambâṅko fezo, iyuc muengopeney. Nâṅâc manapene wiac izi sambâṅte fuli eekac. I mutuc-dâṅ. Jesule soczi kitâcnâpowec, izi fulinâṅec ewec. Ijic moçzi nombâṅko hume oczi âeckeme fohame âgoticnezi la fâleme wefume oc unuckecnêlâ haeo bala jaup bacne-me biapkeocmu. Eme ijic e biapkelâ âgoticne bubianṅte wiac ecneme wemocko ziguc muzo: Fuline iyuc lâcneme nombâṅkonec fâleme wefuwec. Wiac i zâheç nombâṅkonec wefulâ ekicne. Eme nâṅâc iyucjaha mitio wiac piticne eengopeney i Jesuzi bâpiapnâpowecte. Mâc muzac sâqolelâ fonzapey. Ilec Jesule mocjaha muzo. E manasiṅkehuc juzo â e manasiṅkehuc hâmozo. E behelâ sâqolelâ sipilickezo.

9. Jesuzi hâlâcko huwec. I Satante hâlâc mâcne. Ila hulâ wemo ezac? Satan â kikefunfâcticne miti manalâ maṅ bâbâlisie mi fokac. Mâlâcjaha miti mi fuahame ijic qâpuc hâmpie Anutuzi hae mocko lâecjopame mitile woṅec jujumbiey. Zochâlâc â sambâṅ ḡondenjekicko lâecjopawec. Eme jaṅelaohâcne Jesuzi huwec. Sahacticne zâṅelupko foha qâqâtâcticnezi lawec. Jaje sahactâmilic, ilec jaṅelao sahactâmilic lame sâckewec. Lalâ kipjenicte hâ-mome miti fuawec, ilec biṅe jazawec. Jaje manalâ wo-sâepie Anutuzi bâtâc bacjopaocte iyuc ejalewec. Nâṅâc-nao miti fuawec fokac. Ilec hâmpopene moczi mocwâc mi nâzâocmu. Ijic gâcne miti qikipnelâ ziguc muengopiey: Ijosananezi manalâ sambâṅko fewecte fepemu. Me, gâc-nezi hâlâcko hulâ ḡosajenic basawiacmocepie?

10. Jesu e fahalelâ sahaçne bacbâtikie ewec. E fahaleocte sahacticne zâṅelupko fowec i mocwâc lowec. Ilec ḡokac jaje la qâṅqâpticne basambij. Â ejahacwâc biliplâfu jowatume honetalambij. Elâ mâc mi lowec. E bâtikieme fuṅ moc ewec. Mâlâcjaha sahacticne nâṅâcne sahaç iyucne fowec, ḡemâcne, hohonene, zâicheç. Ilec tâtâc juhame honefâlembij â Judajic jaje qapie hâmo-wec. Â zâṅelupkonec wefulâ juwec ine afecne, mi hohonene, zâietâmilic, hâhâmotâmilic. Fuazo mulâ fuawec, sipua ezo mulâ ewec. Sahacfânâṅ ezo mulâ ewec â soṅ-

soṇko fimaṇko fezo mulâ fewec. Sahacticne bâtikieme sambâṇhawali ewec. Elâ tatamacne ine bâsoṇkewec. Ihec fuajaleme muzac hâwicjopame wisenzapiṇ. Ilec jaje honepie ṇic omane hawali ewec. Eme hawaliticne bâtikielâ mâlâc juwecsâc eme honetalambiṇ. Wofuṇ e wiac sasawa ilec micne banâlewec. Eme fahalelâ fuṇ moc juwec iṇucjaha micne banâlewec. Nâṇâc zi mitio juhuc ele hawali enaṇmu eme juku fahalepene iṇucjaha sahaçnâṇec bâtikienâleme fuṇ moc elâ junzongopeney.

11. Jesu e fahalelâ izia mi sambâṇko fewec.

Motecfâcne jaṇelao gie piticne fowec i batalaocte juwec. Jaje biṇeticne mupie haṇ baocte mukicne. Eme fahalelâ mi fuajaleme muzac jaje fuṇneticne sâcne mi mamana-tala mâc hâmowec ilec dâṇ ṇic jazapie jaje manapie mitiṇic gâcne miczi miti muku hâmombiṇ sâc ijaha ezac. Elâ i wiac fulune alicne, muhuc motec jajele dâṇ qikiṇnenzap-iṇ. Eme ilechâcne Wofuṇzi fuasipuac ejalehuc juwec. Elâ fufuasawa mi fuajalewec. Iṇuc ejaleme bawebulec bâfua-nzicipiṇte fuajalelâ dâṇ â miti jazawec, nânâ jaleme nâmbiṇ â jaje e lâcnepiewâc nâwec. Lâfuticne jowatuwec. Elâ ṇafeosawa mâcne, zoaṇko mâmâc fuajaleme honembiṇ. Ehuc fuṇneticne honemanac ejâmbâṇkelâ zâhec biṇeticne qicwânzâṇnelâ mâleṇsâc mupie haṇ bawec. Hâmolâ qâlelâ fahale dâṇ i fulisâko. Iṇiczi hâmolâ fofo i ewalehuc jukicnesanaṇ. Wofuṇ ejahac ṇicṇokac jahecâmoc bâqâlecjopame fahalembiṇ. Elâ jaje fahalelâ mâlâc jumbiṇ iṇuc juku mocwâc hâmombiṇ. Nâṇâcwâc gâcne jajele ziṇuc muengopeney: Hâmoqâlec embiṇ. Elâ i mâc dâṇnâṇecko mupene iṇuc eekac. Moc e dâṇ qiliptâmilic fome hâmokac muengopeney. Qâlembiṇ jaje mi hâmojâmbâṇkembiṇ, maṇṇeyic qâlicne fowec. Hâmolâ qâlelâ fahale i Jesuzi buc ewec. Ehuc nâṇâc micne banâlewec.

12. Jesu e sambâṇko felâ mocwâc tâpililune ewec jukac. Motecfâcticne jaṇelao gieticne batalalâ fewec. Jambunṇopalâ mâzocjopalâ honehapie fewec. Behecnâpolâ fefe i mâcne, mâc tâtâcko fufuazi alictac ewec. Ilechâcne motecfâcne mâzocjopawec. Fewec dameṇ ila soṇsoṇko jujuticne mocwâc maickewec. Elâ isawa mâcne,

jujufāleticne i māmāc maickewec. Ilec ziṇuc muwec: No zoaṇne zoaṇne ṇoṇheh juhāpē mālēṇte dameṇ talazokac. Nāṇāc Wofuṇte kecziṇuc mi munzēpenēṇ: E zolicko faic sambāṇko jukac. E mālēṇ ā sambāṇ māmāc sākkelā juocte fewec. Felā tāpiliticne ā tatamacticne mocwāc lofālelā mamacticneheh sāk mocjaha ewec. Mālēṇko wahalā ṇic nāṇācneheh sāk mocjaha elā juku hāmowec. Ehuc mamacticnele wahamienao juhuc ele kiṇaṇmotec ewec. Sambāṇko felā ine mocwāc tāpīlilune ewec. Ilec ziṇuc mukicne: Anutu tāpīlilune fālenao ṇekac. I ṇeṇeo ṇemanahuc jujule mi mukicne. E tāpīlilunezi mi ṇemanaekac ā ṇeefoc mi eekac. E felā Wofuṇgieticne mocwāc fuṇkewec mamacticneheh baekopilec ilec mukicne. Eme nāṇāc iṇucjaha fehuc gie munālewec i e manasiṇkehuc banzēpenēṇ.

13. Juku lisie wahazokac. Soṇsoṇko julakuhame mālēṇte dameṇ talazokac. Eme dameṇ maickeme mocwāc tātāc fuazokac. Mālāc fuawec iṇuc mācne tāpīli ā tatamac-sākoheh ā aṇelofācne jaṇheh fuame mālēṇne mālēṇne ṇic kiowāwāsīc enzongopenēṇ. I miti nāzāocte mācne, bātāc bacnāpoocte wahazokac. Hālācte biṇe ekicne jaṇe hālācko solecjoṇame huniṇmu ā sambāṇte biṇe ekicne jaṇe locjoṇame ehēc juniṇmu. Adaṇzi hāmome hāmowalehuc jumbiṇsanāṇ jaṇemecne ā qālīcne junzongopīeṇ jaṇemecne māmāc bātāc bacnāpooṇmu. Ehame mālēṇ siloweoṇmu. Dameṇ mi mufuanālewecte lambenāṇec qazepene zaha maṇqālījaha junzēpenēṇ.

*

*

*

13) Manasiṇḍāṇ 3.

No Tilimālo manasiṇkekopac.

1. Tilimālo c Jesuzi ṇic bawec ilec soṇaṇ.

Wofuṇ Jesu sambāṇko felā Mālo soleme wahawec. Jesu mālēṇko wawahatāmilic muzac Mālo ewāc mi wahazac. Wemocko wahazac? Kiṇzi akasāko ewec. Eme Jesuzi nāṇācnele hāmome kiṇ alictac eme Mālole hata fuawec. Elā isawa mācne. Jesu c miṭi ukicne bāfuawec. Eme i Mālozi maṇsāc salahuc basaweocte wahawec. Wīac moc ilec

ukicne mâc fome mi sâckeocmu. I giene bahuc salazo. Eme Mâlo e ipucjaha eekac. Wahahuc izia. Judanġic japelao giesâko hesalac ewec. Ipuc ewalehuc juku nânâcnao gieticne fupkewecwâc. Gie bahucwâc soŋaŋkeekac. Elâ gie i Jesule biġe salaekac, ejahacne mâcne.

2. Zâgeticne hawalitienenele mâcne gieticnele mukicne. Mâlâcġaha Anutuŋi Adanġ bâfualâ mâloticne maġnao ficneme hume qâlewec. Eme Adanġ e Anutu lâpeckeme mâlo e hâmowec. Hâmome Adanġ e maġ hâmocne ewec. Eme qâlicfâcticne sâc ijaha efâlembeg. Sahackopec mâlo omane i fonâleha nakafe heengopeneg. Eme i ninġkeme sahacnâġec hâmoekac, ipucjaha qâqâtâcnâġeczi sambâŋkonec Mâlôtâmilic elâ hâmoekac. Iġic moc qâqâtâcticne hâmome sahackopec wiac ilecsawa manasuhuc juocmu â wiac moczi qâqâtâcticne bâsâqolezacte manabâc mi eocmu. Eme ipucnezi sipilickeocmu. Eme Mâlo eki ine maġnâġec bâqâleekac. Eki maġnâġecko hume qâqâtâcnâġec qâleocmu. Qâleme fupnenâġec mananaġmu.

3. Mâlo e biangkenapte â sanangkenapte giene baekac. Eki maġnâġec bâqâlelâ mi behecnâpoekac. E biangkenapte zuhuckelâ wiac enâleekac. Iġiczi mâc mi biangkezo. Fupne manalâ sâqocnele busâqoc â tatakiec bâfualâ biangkezo. Ilec Mâlo e maġuupicnâġec hebataniġ eekac. Maġnâġec opâ ipucne. Lumi fisihuc qânâ fofackeme mi honexo. Zoanġ qame ine lumi fâlewahame qânâ kâcġene fuaocmu. Eme opâ pitiwame qânâ piticne mâmâc fuafâleocmu. Mâlodzi maġnâġecko gie bame ipucjaha qanaġ qânâsâko fuaocmu, zâġene: Zika, fiuc, sasecte sâsâqole, lâŋgeġne, sindanġ elâ ġâcne. Wiac ilec fupne Mâlodzi bataniġkeme ġic tucne jape sâcne biangkepo muhuc Mâlo soleegopieġ. Eme mi bibiangkehâmo juku maġpuliġ eegopieġ. Alicne, Mâlo e manacnehapene qânâ piticnewâc fuafâleocce gieticne bazeġec. Ehuc hehesicnâġec â bahacnâġec â siocnâġec â sasecnâġec â qâomanâġec ilec fupne nâzânâwotuc ezeġec. Eme i behelâ maġnâġec bâlisiepene Mâlodzi bâpiangkehâmozeġec. Iġic moczi hucsâko fohuc juku weinocko biac biangkelâ sanangkeocmu? Nânâc huc afecne mi bac-

nâpowec. Eme wemocte miti sahaçnesawa manapâlâckelâ no qiqic qalâ sanapkepole Mâlozi jowaqataṇ mocwâc mi enâlezejec muhuc kosa epene zâheç qâqâtâcnâṇec mocwâc hucsâko baekac. Mâlo e qâqâtâcnâṇec dameṇsâc nânâ gumeqij ecneme qiqic qalâ sanapkeocmu. Nâṇâc qiene. (Ije jaṇe wemocko bâluṇ sokasanaṇ eniṇmu? Nâṇâc ilec manasuhuc Mâlo gâc mi hecnenzepeneṇ. Eki behecnâpome mocwâc gegecdodoc elâ hofâzi luanzipente. Mâlole gie nâṇâcnao tatalanehec mi eekac. Ilec hefâlehuc aimuṇ ecnepene gie banâlehuc juhame biaṇkelahuc â sanapkelahuc junzepeneṇ.

4. Mâlohec juhuc wiac epene biaṇkeocmu.

Mâlozi maṇnâṇecko juhuc gie bame fuṇe soṇsoṇko mi foocmu. I mitile enâleme afeckelâ mumanac enaṇmu. Miti gieie iṇucjaha aṇacnâpoocmu. Eme mitikiṇaṇte fuaṇaṇmu â qâpuc mâleṇko lambiṇ juṇgopieṇ dameṇsâc la honec-jopalâ dopecjopanaṇmu. Elâ nunumu bucko â tutumaṇko numunaṇte iṇucjaha Mâlozi baafecnâpome tatakictâmilic enaṇmu. Haemâleṇ mocko miti haṇ bame manalâ bubiaṇ enaṇmu. Mocko miti sisipilic fuame busâqoc mananaṇmu. Nâṇâcne maṇko bahac fuame biac hâwicnâpome mufuaṇaṇmu. Wiac iṇuc fuame muzo: Mâlozi gie bame fâline fuakachâcne. Â qacqâtikic wiac fuame ine muzo: Mâlotâmilic juṇgopeneṇ. Mitile qâoma, nunumule tatakic, mitikiṇaṇ qiqikiṇ, bahac fuame hehesoṇ, mitile ima fuame nifepupuc ee, lâṇgeṇe â maṇ bâbâlisietâmilic juju ine Saṭaṇte mâsi sasawa. I biaṇkenaṇte mâcne sisipilickenaṇte wiachâcne.

5. Mâlo e docko bâninipelâ wahaekac. Doc i Wofuṇ Jesuzi lâewec, zâṇene miti. Eme motecfâcne jaṇe miti â nunumuhec juhapîe jaṇelao wahawec. Kâcçenefâcnâṇec jaṇelao iṇucjaha doc fuame baafecjopame wiac laṇqane behembiṇ. Eme nâṇâc doc i mi hetâcnenzepeneṇ. Mitile qâomaehuc nunumu hetalananaṇmu, uupicte â ṇafeo gaebinaṇ mi ehuc bozesâc folanaṇmu, ine Mâlole doc hetâcnenanaṇmu. Eme Mâlotâmilic elâ mocwâc qâṇqâṇ elâ fonanaṇmu. Me Mâlâlê ṇeṇeo hatapitic zipene iwâc biac wi-seocmu. Nâṇâc miti haṇ baocte â feocte enâleme doc so-

ṇaṇkehuc Mālo dameṇsāc hefālenzepeneṇ.

6. Mesiale kikefufāc bātumagnāpome tili moc elā jungopeney. Satay e zikalune, ilec ṇic ākefāucnāpome lālāsi eengopeney. Mālo eki ine wamalune ilec ṇic bātumagnāpome gulu mocjaha eengopeney. Nāṇāc ine ufuy mocjaha elā manapene talaekac. Eme ilec ufusāc aka lāengopeney. Elā isawa mācne. Ufuy izihawāc lālāwiṇ jueṇgopeney. Ehuc ṇic gācne nāṇāc miti jazapene manambiṇ jaṇele manapene wawahane eekac. Nāṇācnele ṇicbomboṇ muhuc jaṇele kiṇaṇqaqafācnāṇec muengopeney. Iṇuc ehuc Mālole māsī sipilickepene lālāwiṇ ā bātāc fuaekac. Mālo eki ine ufusāc ā mālēnsāc gulu mocjaha elā junapṭe giene baekac. Ilec nāṇāc ufuy motec ṇiczi miti boc sipilickepie ziṇuc mi munzepeneṇ: Jaṇe moc ā nāṇāc moc. Alicne, i bācicjopazo ā uṇsawaṇ ejalezo. Me nāṇāc bahac moc me gie moc bāipielā ufuy mockonec kuku qajalenapṭe manabāc mi enzepeneṇ. Gulu mocjaha elā āāgo ehuc dodopec ezo ā jaṇṇ babac ezo ā soṇaṇ babac ezo. Ehuc tili moc elā juzo. Āākelāwiṇ ee, doc babac ee, sahacko lālāec ee, aalicko bābāsāqolec ee i Mālole māsī mācne.

Mālozi bātumagnāpoekac ine ejahacne kikefufāc enapṭe mācne, e bātulecnāpolā Jesulao lāecnāpoekac. Mālo e Jesu mi ākehockeocmu. Jesu e nāṇācnele elā hāmowecte lunāṇec ewec jukac. Ilec Mālozi ele kikefufāc enapṭe hefālecnāpoekac. Wofuṇnāṇec mocjahale ṇiczi iṇucjaha mocjaha enzepeneṇ. I sambāṇko felā junapṭe Mālozi iṇuc enāleekac. Sambāṇko bātāc ā kisā mi fokac. Ila felā māc āāgojāmbāṇ elā mocjaha juzo. Ila fepene Wofuṇzi miti bābāni manambey ā zāhec manāṇgopieṇ ā juku manāṇgopieṇ mi bātāc bacnāpolā gulune gulune lāecnāpoocmu. Me ufusācwāc mi lāecnāpoocmu. Lālāsi ā bātācko juju i hālācko fokac.

7. Sāqocene bābātāmīle fokac. Izi qizecne. Sāqocene tāmīlehamē ine Mālozi zuhuckelā wiac gācne bāfuaocmu. Maṇnāṇec qaqačkeme maṇwama fuame Mālozi sācne bātumagnāpome gulu mocjaha elā junapṭmu. Elā juku sācne hāmōckonec fahalelā juṇusanapṭ junapṭmu. Ilec

ṇiczi sâqocne gâṇkelâ juju â sâqocne hesoykelâ sasakale â sâqolelâ maṇ mi bâbâlisie, wiac i behenzepeneṇ. Sâ-qocne fonâlchame gulu mocjaha mi ezo â Jesule kikefuṇ mi ezo â jujusanāṇ mi juzo.

Nâṇâc Jesulao sâcne mi qohotaengopenenṭe maṇjahec boc eenṇopenenṇ. Miti bajupemu me mâcne, mitigie bapemu me bâsifuckepemu, Jesuhec juku hâmpemu me alicne? Keciyuc mupene nâṇâcnao maṇjahecsâko fokac. Mâlâcjaha mitiṇic jumbiṇ jaje iṇuc mi embiṇ. Jaje Jesuzi sâqocne bâtâmilejaleme biāṇkelâ Mâlohec juhuc jujujepicte me miti babajujepicte me qâqâtâcjepicte boc mi maṇbahacjopawec. Â nâṇâc ine jupe sâqolepe â miti bajupe sipilickepe ehuc jueṇṇopenenṇzi Wofuṇ onzonjalia beheengopenenṇ â Mâlo qeṇfâfâcjaha jâpeengopenenṇ â qâqâtâcnâṇec maṇbahacfâfâsâc qaisockeengopenenṇ. Wemocte Jesuzi sâqocne bâtâmilênâleme izi maṇnâṇec mocwâc bâgâpâleengopenenṇ, wemocte Mâlozi Jesulao lâecnâpome mâc aluckelâ mocwâc lâpeckeengopenenṇ? Nâṇâc becluc iṇucne. E kâteonec haeo fisilâ nânâ nâpâlâckelâwâc huckac. Sâqocne bâbâtâmile fokac i sâqolehuc junāṇte mâcne, biāṇkenāṇte fokac.

8. Hâmockonec fafahalec. Mâlo e wiac sasawa biāṇkefâlœocte gie baekac. Eme juku hâmockonec bâqâlœecnâpome gieticne talaocmu. Wofuṇ e maṇnâṇecsawa biāṇkeocte mi muckac, e sahacnâṇec māmâc biāṇkeocte muckac. Dameṇ ziṇuczia sahacnâṇec huczâichec â dodocne foekac. Juku hâmpene mâlœṇko hulâ zankeocmu. Eme tâpîlîlunezi juku mocwâc bâqâlœlâ bâpiāṇkeocmu. Eme sahaczi qâqâtâchech sâc mocjaha elâ junicmu. Dameṇ ziṇuczia sahac qâqâtâc sâctili eekopilec. Sahaczi ṇemâcne, qâqâtâczi afecne. Sahaczi hohonene, qâqâtâczi mi hohonene. Sahaczi huchâmochech, qâqâtâczi huchâmoctâmilic. Sahac qazo, qâqâtâc mi qazo. Â juku ine sahac â qâqâtâc sâckoa enicmu. Dameṇ ziṇuczia sahaczi qâqâtâcte fuṇne mi bataniṇkeekac. Ilec wemocko ṇic moc sahachawaline biāṇne honelâ ziṇuc muzo: Qâqâtâcticne iṇucjaha biāṇne. Mâcne, ṇic gâcne sahachawalijēṇic biāṇne â qâqâtâcjēṇic sâqocne â gâcne jaje qâqâtâcjēṇic biāṇne â sahachawali-

jeṇic sâqocne. Juku ine sahaç â qâqâtâc hawalijekic mocjaha eocmu. Eme moc e Jesule juku biapkewecsâc tata-machec juocmu â moc e sâqolewecsâc mamakâchawali eocmu. Jesule piçfâc jaḡe sambâṇhawali eniṇmu â Satapte piçfâc jaḡe hâlâchawali eniṇmu. Biapkembiṇ jaḡe sahaç-hawalijeṇic aṇacne eocmu â sipilickembiṇ jaḡe sahaçhawalijeṇic hâhâwicne eocmu. Ilec juku fafahale dameṇko hohonec elâ fuṇne mamaṇac enaṇmu. Mâleṇko ṇic moc galahec juhuc wemocko hesoṇkelâ mic baocmu. Fafahale dameṇko ine moc e qâqâtâcticne galahec ewecko sahaçticne ipucjaha galahec eocmu. Moc e qâqâtâcticne bulec me sasechec ewecko sahaçticne hawali iḡaha eocmu. Eme dameṇ ila hehesoṇzi alictac eocmu.

9. Jujusanapte dâṇ. Wofuṇ Jesuzi nâṇâcnele wiac ewec â Mâlozi gie baekac i ṇiczi biapkelâ jujusanapṇ junapte. Anutu e mâlâcjaha Adaṇ bâfualâ jujusanapṇ juocte muwec. Eme Adaṇ eki lauticne â jujulune lâpeckeme hâmoc fuawec â hâmocte susucne huczâic fuawec. Eme izi fohuc juocte Anutuzi mi muekac. E ṇiczi fafahale dameṇko biapkehâmolâ jujusanapṇ junapte muekac. Mâleṇko jujusanapṇ mi fuaocmu. Wemocko sâqocne alictac eme fuaocmu. Ilec jujusanapṇ i sambâṇko felâ julazihuc juzo. Zila mâleṇko wiac sasawa tatalanehec, sambâṇko ine tatalanetâmilic. Aṇac â zeli â wama â bubiaṇ i fohuc juocmusanaṇ. Sambâṇko wiac moc gâleckezapṇ me sipilickesâqolec mi eocmu. Ila wiac sasawa biapneha fohuc juocmu â ṇiczi ipucjaha tofatâmilic juhâmohuc juzo.

Elâ jujusanapṇsawa mi fokac, sisipilicsanaṇ i mâmâc fokac. Jujusanapṇ â juuapac i jujulunele haeosawa fokac. Eme moc e mâleṇko jujulune lâpeckesanaṇkeocmu e hâmolâ wemocko maickeocmu. Mâlâc Adaṇ â qâlicfâcne Anutule mâsi sipilickepie motecticnezi wahalâ bâbiapke-wec. Eme ele mâsijahawâc sipilickepene fainao bâbâbiapke i mi fokac. I sipilickezo mocjaha. Eme sisipilic hao wiac fokac, i ipucjaha tatalanetâmilic. Ila zâic â busâqoc a hâhâwic â dapâc fohuc juocsanaṇ. Zila mâleṇko ṇic gâcne huczâic me buzâic wiac boc ejaleme mueṇgopieṇ: Hâmolâ biapnuoc. Hâlâcko wemocko ipuc muzo. Jaḡe alictac eniṇ-

te ejaleocmu elâ eipienijmu. Ilec nâjâc updân manalâ Mâlo mi qaisockenzepenej. Eme eki nâjâcnao gieticne bahuc juha jujusanajko fisingepenej.

* * *

14) Nunumule dân.

1. **Nunumu i qâqâtâcte nakafe.** Sahaczi qâlicne juhuc nakafe heengopenej. Hâmolâ ine nakafetâmilic fozo. Qâqâtâcte fupne ijaha fokac. Ilec njic moc nunumutâmilic juhuc fupne zijuc manazejec: Qâqâtâcnane hâmocne fokac. Â moc e lijkoa numuocmu e ine qâqâtâcnane huc bakac muzejec. Sahaczi nakafe gâbâ heengopenej, ijucjaha manzi nakafe gâbâ hezo, gâbâ numuzo. Ijuc ehuc Jesule mapfupko sâcne juzo. Moc e zoagne zoagne numuhuc juocmuzi wemocko Jesu onzonjaha lâpeckeocmu, me wemocko miti manbahacfâfâsâc beheocmu? Nunumutâmilic juku ine jâmbomâc sâqocne hâhâwictâmilic bazo. Hae gâcnao wiac boc sifuckeekac, i njicpokac jaje nunumu behefâlembigte ijuc fuaekac. Â njic gâcne damejsâc hehesic juegopiej, jaje ijucjaha nunumutâmilic juhapie qâqâtâcjepic hâmocne ewecte jupie sâqoleekac. Wofup Jesu e mâleņko juhuc keczijuc muhuc nunumu mi hetalawec: No sambâņkonec. Alicne, e mamacticne gâbâ numucne jujec. Eme mâleņkonec njic hehesicz i nunumule qâoma epene wenijuc eocmu?

2. **Nunumu i lili.** Ila sambâņko fezo. Felâ tâpili â miti â tatamac â jaup lozo. Elâ mitihec elâ sanajkelâ juzo. Lili i behelâ dodocne, tacqalalacne, mapmutuc elâ juzo. Lilio fecwahac ehuc afeckezo. Lili qikiņnelâ jemâc-kezo. Lilio damejsâc fecwahac ehuc juku hâmolâwâc sâcne sambâņko fezo. Lili qikiņnehuc juku sambâņko fezole bititiez.

3. **Maykopec â sahackopec wiacte numuzo.** Huczâicko bafienâpoocte, damej bâzolanâleocte, nânâ jambuņkenâleme fuaocte, ųezicnâpoocte, nalumotecte, pokacte â wiac gâcnele i numucnezo sasawa. Elâ maykopec wiacte nunumu izi qizecne ezejec. I biankenajte â eesâicko sanajkenajte â miti â Mâlohec enajte numucnezo.

Mitizi pondepnâpecko fuahâmoocete â qâpuc mâlepko hap baocete numuzo. Elâ wiafcâcnâpec â haefâcnâpec â nalumotecfâcnâpec â sonaj babafic qaqazufâcnâpec â mitikiqaj lakicne â opâluac â qâleŋ ɲicɲokac â qâpuc â qâsoliekicne â huchec japele mâmâc sasawa numuhuc juzo. Nunumugie wemo afecne fokac. Elâ nunumusawa mâcne, mumuteŋ i Wofupnâpecwâc mutenkehuc junzepeneŋ. Sesicnâpohuc wiac wemo afecne enâlewalehuc juekac.

4. Nunumu hehesic. ɲic tucne nunumule manapie qangetinac eekac. Eme mâlâcjaha wiac biapkeocete â sâqoleocete ilec qanget bajumbepete ɲic gâcne jape wiac biapkeocetesawa mâcne, wiac sâqoleocete â ɲiczi hâmosipilic enipte ilec mâmâc numuengopieŋ. Nunumu hehesiczi ine tipnelune elao mi feekac, i sâqocnelune elao huekac. Eme eki nunumu hehesic muocmu ɲic elaohâcne fisilâ mapbâsifuc ecneocmu.

*

*

*

Nunumusâko.

15) Sambâŋ mamacnâpec.

1. Wofup e mamacnâpec. Anutu e bâbâfuanâpec â lunâpec. Mâlâcjaha mâlepko wiac lâefâlewec i ejahacnele mâcne, nâŋâcnele lâewec. Elâ ekihâcne ɲezicnâpoha juengopeneŋ. Itânilic muzac huc mimicne moczi me homeŋzi mâlâcjaha omaecnâpozac. Elâ isawa mâcne. Nâŋâc e behelâ sâqolehuc juhapene mi qikiŋnâpowec. I biapkenapte motecticne lâeme wahawec. Mamacnâpechâcne jukacte nâŋâcnele mapne boc domawecte ipuc ewec. Elâ gâgâpâc nâŋâc ele nikecnâpome dapâcmapko hufâlepene nâŋâcnelewâc bune sâqoleme biapkenapte miti lâenâlewec. E mamacocnâpec mâcne, e mamacfupfupnâpec jukacte ipuc enâleekac. Mâleŋsâc ɲic mamacsâkonâpec jukachâcne.

2. Nâŋâc nalumotecfâcticne. I manasuhuc sambâŋmamacnâpec manasiŋkehuc junzepeneŋ. Ehuc qâmâtâc me qâoma mi ecnenzepeneŋ. Nalumotec jape wiac i me i ejaleme neŋgocmamacfâcjeŋic jazaengopieŋ, ipucjaha

nâŋâc sambâŋmamacnâŋec dâŋ âzâcnefâlenzepeneŋ. Mâleŋmamacfâcnâŋec jaŋelao wiac mocte mupene moc i nâleengopieŋ, moc i basaengopieŋ, moc i baficnâpohuc ŋezicnâpoengopieŋ, moc i eipieengopieŋ. Sambâŋmamacnâŋeczi ine tâpililune jukacte wiac mi basaekac â mi bititieekac â wiac mi bâipieekac. Ele enâleha junapte Jesuzi wahalâ ziŋuc nâzâwec: Anutu e lâsiŋeŋic mâcne, e mamacŋeŋic. Eme ilec mamacnâŋec nunumu â mumuteŋ â dange ecnezepeneŋ. E jâiŋko wiac mi nâleekac. Lâsinâŋeczi jâmbomac sulucnâpohuc wiacticne nâleekac. Â sambâŋmamacnâŋeczi ine e manasiŋkehuc âzâcnepene wiac nâleocmu. E jâiŋko mi bâpiaŋnâpoekac â jâiŋko mi laucnâpoekac â jâiŋko mi sambâŋko lâecnâpoekac. Ilec nâŋâc gâbâ numucnehuc junzepeneŋ.

*

*

*

16) Gole zâŋe tili fozejec.

1. Qanaŋ Anutule mulâ zâhecc nâŋe nâŋâcnele muzu. Fuŋne iŋuc mananapte Wofuŋ Jesuzi nunumusâko kecziŋuc muhuc bilickenâlewec: Gole zâŋe tili fozejec. Gole miti walezejec. Gole mic leŋkenzepeneŋ. Eme zâhecc ine nânânâŋecte â kiŋnâŋecte â eesâicnâŋecte â sâqocne-nâŋecte numuengopeneŋ. Anutu e kâcŋene, lusâkonâŋec â nâŋâc piticne, ilec ele qanaŋ mulâ zâhecc nâŋâcnele mupene sâckeocmu. Elâ ilecsawa mâcne. Sambâŋkonec wiac ilec fâline nâŋâcnao fuame sâcne biankelâ junapmu. Izi hobetepne. I mi fuame Anutuzi wemocko nâŋâcnaopec wiac sâcne enâleocmu. Zâŋeticne ŋondeŋnâŋecko tili mi foocmu â mititicne sâcne mi fuaocmu â micticne mi leŋkenapmu eme wemocko Anutuzi kiŋnâŋec beheocmu â wemocko eesâicko ŋezicnâpoocmu â wemocko sâqocnaonec batalacnâpoocmu. Ilechâcne Wofuŋ Jesuzi nunumule fuŋne qazunâlewec sâc ijaha numunzepeneŋ, ejahacne wiacte qanaŋ mulâ zâhecc nâŋâcnele munzepeneŋ.

2. Wofuŋte zâŋe miczi kosa mupene â juju kosa jupene sâqoleocmu. Dâŋ kosa muhuc Wofuŋte zâŋe mumu, zolaŋko â bulecko mumu, lune mi manasiŋkehuc mumu i bâbâsifuc sasawa. Ŋic moczi iŋuc eocmu ele ziŋuc

muzo: E lunele maname wawahane eekac. Eme moc e maname ijuc eme wemocko miti sâcne bajuocmu? Nâpâc ine lune alaj bacnehuc zâpeticne lumehuc munzepenej. Elâ kosa jupenewâc Wofunte zâpebiņe sâqoleocmu. Nâpâc miti sahaczisawa bajuhuc hehesic jupene ilec fâline nâpâc-nao mi fuaocmu. Eme hae hata sâsâqole, ņicfic â mitific lelepile, bozeo fofo, micleleptâmilic juju, sasec â kisa bâ-bâfua ijuc fuame ņic qâpuc jape honelâ mitile manapie fâlitâmilic eme Wofunte zâpebiņe sâqoleocmu. Â kosa jupene qaqqa gâcnezi honecnâpopie sâqoleme qaqazu zijuc jazanijmu: Gâgâpâc mutucne wemocte miti qazu-jaleengopieņ? Eme mitizi gâgâpâc mi bâbâpiagnâponetinac eocmu. Eme ijucjaha Wofunte zâpebiņe sâqoleocmu â ijuc ehuc Wofuņ mimiqaqa ecnenajmu. Nâpâc ine tiņne juhuc miti fâline bâfuapene Wofunte zâpebiņe biapkeme ilec mumutepsâko fuazejec.

*

*

*

17) Gole sambâj miti fuafâlezejec.

1. **Miti nâpâcnao fuahâmozejec.** Miti i nâpâcnao fuawec. Qâpucsâko juhuc Wofuņ mititiclele mi wâsickehapene buulucticlele lâenâlewec. Zi ine fuņne manaengopeneņko qâoma mi ecnenzepenej, keczijuc muhuc: Miti nâpâcnao fuawec, ilec wemocte sambâj miti fuaocte numuzo? Alicne, miti mi fuahâmowec. Maņnâpecko miti boc mi fokac. Ńondeņnâpecko bocjahazi miti hetalalâ sipilic-keengopieņ. Nalumotecfâcnâpec japewâc mitihec enzepieņ. Ilec mitizi nâpâcnao fuahâmoocte numuzo. Miti opâ fifisine igucne, ilec zâpe tikio fokac. Eme tikionechâcne opâ wahahuc fohame opâ mi zickeocmu. Mitile fuņne ijaha fokac. Ilec zâpe sambâjko fokac. Eme ilecnec wahahuc fozejec. Qâtâcneme miti nâpâcnao alictac eocmu.

2. **Miti haņ bazejec.** Nâpâcnao fuahâmolâ sâcne haņ baocmu. Â nâpâcnao pitivalâ wemocko qâpuc japelao fuaocmu. Elâ qâpuc mâleņko mâc mi fuaocmu. Mâlozi ņic baafecjopame la giene bapie haņ baocmu. Â neņgoc-nezi mitikiņaj lakicne nunumuzi dopecjopapene â japele money mafa bâfuapene miti haņ baocmu. Nâpâcne mâ-

lepko qâpuc bocjaha julaengopieņ. Eme jaņelao miti lame biāņkeniņte miti aimuņ bajuhuc numuzo â giene bazo.

*

*

*

18) Sambânko gole micleleņ fokac, iguc-jaha mâleņko nâņelao fuazejec.

1. **Sambânko micleleņte aņac fokac.** Aņelo â hāmokicne sambânko juengopieņ jaņe qaqatalacte manapie tatakicne eekac â micleleņte manapie aņacne eekac. Ilec jaņelao dāņ qiqikiņ me qâoma mi fokac. Jaņe moc i Anutule dāņ leleņke â moc i qaqatala i mi eengopieņ. Mâc leņkehucjaha juengopieņ. Ilec jaņe sâcne juhâmoengopieņ. Jaņelao bahac me dāņgie mi fuaekac. Jaņe qaqatalac moc bâfualâ aņacjeņic sipilickenzapiņ. I mâlâcjaha Satāņzi ewec.

2. **Nâņâc jajele sâc enzepeney.** Nâņâc Anutule kikefuņfâcjahawâc. Eme ilec micticne leņkenzepeney. Iguc epene miti nâņâcnao gâtâ balâ fâlinehec eocmu. Nâņâc ine moc i Anutule dāņ qaengopeney â moc i tatakic faio leņkepâlâckeengopeney. I mi sâckeekac. Anutu e dâņticne leņkenāņte muekac, i ejahacnele manasuhuc mi muekac. Ņiczi biāņkelâ micleleņte aņac bâfuanāņte muekac. Nâņâcnao micleleņ piticne fokac i aņacte mâcne, mâc dâņticne qatalalâ sâqolenzipeņte hâhâwic fokac, ilec dāņ gâcne leņkeengopeney. Eme dameņne dameņne qaqatalac qikiņnehuc Anutule dāņ leņkeku ilec aņac bâfuanāņmu. Ehuc sambâņkonec jajele sâc enāņmu. Eme juku jaņelao sâcne zuhuckenāņmu. Â micleleņte tatakicsâko â qaqatalac ilec aņac bajupene qacqâtikic eme wemocko jaņelao zuhuckenāņmu. Wemocte mutuc elâ qaqatalac â qâoma ilec manapene sâqocne fâline mi eekac? Wiac ilec elâ hâlâcko huhune fokac.

3. **Anutule dāņ i biāņne â tiņne.** Ilec i leņkehuc biāņkezo â tiņkezo. Satāņte dāņ ine hehesic â sâqocne, ilec i leņkehuc hesilelâ sâqolezo. Nâņâc Anutule dāņ qatalapene ilec mi bititieocmu. E nâņâctâmilic sâcne juocmu. Nâņâc wemo bacnenāņmu, fic me gie? Alicne, dāņ leleņkele i nâņâcnele manasuhuc muekac. Dâņticne

gatalahuc sâcne mi juzo, i sâqolelâ sipilickezo. Moc e sahaç sosopante dâŋ qikiŋnelâ hucsâko bâfuaocmu. Qâ-qâtâckopec sâc ijaha fokac. Satap eki dâŋ qacqâtikic nâzâekac. Wofuŋzi eniŋ mume Satapzi mi eniŋ muocmu. Â Wofuŋzi mi eniŋ mume Satapzi eniŋ muocmu. Satap e lâsinâŋpec jukacte ele dâŋ qikiŋnehuc mamacnâŋpecte mic lejkenzepeneŋ. Ehuc sâcne juhâmonzepeneŋ.

*

*

*

19) Go miŋecgac nânânâŋpec nâlezemec.

1. **Nânâ i lunele manasuhuc banâc ezo.** Wofuŋ e nânâ ŋic mâmâc sasawa bâfuanâleekac. Mitiheczi nânâle numucnepene nânâle â mititâmiliczi e mi numucnepie sasakalejale, iŋuc mâcne. Iŋuc enâleme muzac mâc nânâle â wiac omane le manasuhuc elao qohotanzapeŋ, qâoma ecnepe nânâ sakalenezac muhuc. Eme maŋkopec wiacte mozi manasuzac? Ilec Wofuŋzi ŋic tiŋne â hehesic nânâ mâmâc nâleekac. Eme nâŋâc lunele mi muhuc â e mi numucnehuc nâpene fiuc eocmu. Elâ isawa mâcne. Mamacnâŋpecte mi manasuhuc nânâ banâc enaŋmu ine bec-gowi jaŋele sâc enaŋmu. Iŋic moczi iŋuc elâ maŋne wiac nâkicnelesawa domaocmu. Ehuc wiac nâbâle â nâaleŋ mâle tec eocnu. Iŋuc engipeŋte mamacnâŋpec numucnepene nânâ bâfuanâleme buulucticnele daŋge âzâcnenzepeneŋ. Elâ miczi daŋge mumusawa mâcne. Zekepuliŋ â hozecbekâ nânâtâmilic jupie jalezo â nânâ tucne mitile moneŋ kiocte lâezowâc. Izi daŋge fâline.

2. **Gie bapene mâlili fuame sahaç mumuteŋ mi ezo.** Iŋic tucne ziŋuc muengopieŋ: No gie zoqac bape wiac bocjaha fonaleekac. Gie bapa i bazo. Ojoŋ fohuc Anutulao nânâle muipiehuc juzo. Mâlâcjaha Anutuzi gie le muwec, i Jesuzi wahalâ mi qatalawec. Elâ gie bapene wiac fuabian eme nâŋâcnele mupene sâqoleomu. Mozi honesoŋaŋ enâlehuc ŋezicnâpoŋa fâsâcne juengopeneŋ? Me mozi mume hoezoŋaŋ sâckoa eha wiac hesalac epene fuabian eekac? Iŋiczi gie sâcne soŋaŋkenaŋmu? Beczi fisilâ nânâ nâme sac hahafene fokac. Â paluc me qo-kiczi nâme iŋucjaha sac hafezo me? Ilec sahaç mumuteŋ

behelâ Anutule mocjaha mupene sâckeocmu.

3. Nânâ i zâŋesâko mukicne. I sahackopec wiac qâhâckekac. Fichae, lâlicsâqe, moneŋmafa, paqiqoluc â wiac gâcne itâmilic sâcne mi junâŋmu. I mamac-nâŋeczi manaekac. Elâ ââgo elâ babafic ehuc gienâŋec sâcne banâŋmu. Elâ wamao mâlili sâcne fuaocmu. Mâlâcjaha zikao loloc fojujec. Â kia biâŋnezi soŋaŋnâpo-hapie wiac sâcne banâc enâŋmu. Hehesiczi losipilic enâlepie haeo ŋicŋokacqizec â ŋokac nalumotecsawa juhuc gie sâcne mi baniŋmu. Ilec nânâle numuhuc wiac ilechâcne mâmâc manasunzepeney.

*

*

*

20) Kintofanâŋec behezemec, nâŋe iŋucjaha âgofâcnâŋec jajele kintofa behenâŋmu.

1. Kipnâŋecte fuŋne sâcne mi manaŋgopeney. Wiac hehesic mi enâŋte muacnâpokicne i eeygopeney â wiac tiŋne enâŋte mukicne i mi eeygopeney. Wiac behesic fiuc, zika, bulec, sasecte sâsâqole i manapene kiphec eekac. Â mitio wiac enâŋte mukicne ilec qâoma elâ mozi maname kiphec eekac? Maŋapic e wemo elâ hâlâcko huwec? E qâoma eku huwec. Nâŋâc ine ziŋuc muengopeney: Wemo wiac sâqocne eekopac? Nunumule qâoma, mitile tatatikic, jaunâmilic juju, Wofuŋ mi mamanasinŋke, maŋzi wiac huhule â wiac gâcne, kecilec mozi maname sâqocne fâline eocmu? Moc i mitio wiac ee i piticne enâŋmu elâ epene Wofuŋtao mi qacneocmu, ele elâ mi enâŋmu, nâŋe nâŋâcnele enâŋmu, sahacmumuteŋte â ŋicbomboŋ enâŋte. Iŋuc ehuc esifuckeengopeney. Nâŋâc paosâko ziŋuc muengopeney: Nâŋâc ŋic sâqocne â hehesicne. Ehame ŋic moczi maiqanzan ziŋuc nâzâocmu: Go ŋic hehesic. Eme biac boselâ sâqocnenâŋec ŋezickenâŋmu. Moc i miczi no ŋic lepicne munâŋmu â maŋzi ine ziŋuc manasunâŋmu: No ŋic biâŋne. Eme iŋucnezi ziŋuc munâŋmu: Kintofanâŋec behezemec, i bulec eocmu.

2. Mitizi maŋnâŋec batamaeme sâqocnenâŋec honemanac enâŋmu. Mitizi maŋnâŋecko huocmusâc hehesicnâŋec bajanŋenkeocmu. Ilec ŋic moczi sahacticne

muteŋkehuc hehesicticne â kipticne mickeocmu ele mitizi mapticnao mi hujec fokac muzo. Â ȳic moczi jâmbomâc mitio juocmu, e fuȳneticne zȳuc manaocmu: Wofuȳzi dapâckonec locnulâ ejahacne maȳfuȳko lâecnuwec, ilec bubianȳ boc mi manaekopac â Jesuzi nole liuc hâmwec, ilec boc mi manasuekopac â elao qoqohota i sanȳne mi qohotaekopac â nunumule ȳeȳemâc â tatakic i nolao mi alictac efâlewec â sasec, andac ilec hâhâwic nole maȳko afecnemac fokac. Kec, mitiheczȳ fuȳneticne iȳuc manalâ kipticnele manasulâ Wofuȳ alay piticne bacneocmu. Eme Wofuȳzi kipticne sâcne behelâ bâpiaȳkeocmu.

3. ȳic jajele kiȳ tofâ behepene Wofuȳzi nâȳacne iȳucjaha beheocmu. Kâcȳenefâcnâȳec jaje kiȳ bebehele mi manapie sâckewec. Jaje mumbiȳ: Kiȳ i batalazo. Eme batalahuc kiȳ qâiȳneȳe faiofefe eme bâpie-mbiȳ. Wofuȳ eki ine kiȳ babatalale maname ȳemâckewec. Ilec motecticnezi kiȳnâȳecte hâmoocte muwec. Eme aki â wama fuawec. Eme nâȳâc iȳucjaha aakic enayte mu-ekac. Eme nâȳâc ine kâcȳenefâcnâȳec jajele hata âtenayte maȳnâȳec boc domaekac. Ilec ȳic jaje hehesic moc enâleȳie kiȳȳeȳie mi bebehe mâc lâepene foekac. Eme juku wiac moczi hefuame kiptofa bazujaleengopeney. Eme nâȳâc kecziȳuc numupene sâckeocmu: Gokizia nâȳele kiȳ behezemec, nâȳe ine âȳofâcnâȳec jajele bajunaymu. Kiȳ bajuhuc wemocte Wofuȳ bulec ecnehuc zȳuc munaymu: Âȳofâcnâȳec jajele kiptofa behenaymu.

*

*

*

21) Eesâicko mi lâecnâpozemec.

1. Eesâic fuȳne fuȳne fokac. Sasecte eesâic, aalictē eesâic, fiucte eesâic, bulecte eesâic, oȳoȳ qâoma ilec eesâic elâ gâcne gâcne. Nâȳâc Satayte muengopeney: Eki esâicnâpoekac. I jâmbomac muengopeney. Zâȳene eesâiclau mukicnehâcne. Elâ ekisawa mâcne, maȳnâȳeczȳwâc sulucnâpoekac â ȳiczi iȳucjaha sâȳocnele jâiȳnâpoengopieȳ. Satay eki wiac jajahec nâwotuekac, ayac â hâhâwic. I Wofuȳnâȳec ijaha ecnewec. Mâlâcko wiac ayacne â elinehec jâutuhuc esâickewec. Gezemane jufuo ine wiac

hâhâwicne jâutuhuc bâdockezo muwec. Eme nâŋâc sâc ijaha enâleekac. E maŋnâjecko sâqocnele apac bâfuaekac elâ wiac gâcnele hâhâwic mâmâc bâfuaekac. Eme motec tuecne mâleŋ wiwicko lalâ qangete hâwicjopame miti beheengopieŋ. Â hao moteczi wiac kosa epie ŋic soŋaŋ tuecne jaŋe jazabâtij ejalepene kia âzâcnenziŋij muhuc hâwicjopame qâoma eengopieŋ.

2. Eesâicko fupnenâjec tanijkeekac. Mâŋâŋzi jâcte fupne batanijkeekac. Qame jâc hâmocne â semune helickeekac â gâtâne mâleŋ maŋko mi hukicne ine qâfieekac. Â sanapne â gâtâne hukicnezi ine mâc lacwalec ehuc domaekac. Eme ŋiczi ipucjaha eesâicko woŝâenaŋmu. Mitile tatakichec â nunumule qâoma ee â Wofuŋ mi manasiŋkehuc juju â mâc sahaŋzi mitihawali juju, keciŋucnezi eesâicko Wofuŋ lâpeckenijmu. Â mitile bubiaŋ mamana â nunumuhec juju â qâqâtâcte manabâc ee â sisipilicte alaŋ bapa keciŋucnezi eesâicko Wofuŋte woŝâenijmu. Ŋic tuecne jaŋe fupnejeŋic sâcne mi manaengopieŋ. Jaŋe miti mâc sahaŋzi bajuhuc no mitio sâcne juekopac muengopieŋ. Ehame eesâic fuame dockelâ bipictatala ejaleme fupnejeŋic manaengopieŋ. Dawidi â Petolo jahe ipuchâcne epic.

3. Eesâicko sanapkenapte mukicne. Sataŋ eki dockelâ sâqolenapte eŝâicnâpoekac. Â Wofuŋ eki eesâicko sanapkenapte muekac. Josefe eki ipuchâcne ewec. Eme eesâic fuame ele manasuhuc wâsickepene basanaŋnâpome wemocko dockenaŋmu. Wiac Wofuŋ haliŋkehapene falame falanaŋmu me? Eesâictâmilic muzac mozi Wofuŋte sâcne manasuhuc juzac me mozi nunumu gâbâ numuzac me mozi mitile zoqac ezac? I dodocne â lolokacne sasawa junzapeŋ. Ipucne locnâpoocte Wofuŋ mi ecneekac. E muekac: Eesâicko nole elâ sanapkepie sambâŋko lâecŋopapemu. Eme mitiheŋ juhapene eesâic moc fuame i biac hâwicnâpome Wofuŋ manasiŋkehuc sâqocnele qafeŋ qikiŋnenapmu. Eme eesâic alictac eme sasanap â bubiaŋ piticne mananaŋmu. Dameŋsâc ipuczi ipuc eku sanapkejâmbâŋkezo.

4. Eesâiczi sipilicnâpozacte numuzo. Wofuŋ Jesu e nunumu keczipuc mi qazunâlewec: Anutu go mutec

eesâic alictac ezejec. Mâcne, mâlepko juhapene* eesâic alictac mi eocmu. Sambâpko eesâictâmilic junapmu. Ilec zîjuc numuzo: Eesâicko mi lâecnâpozemec. Nâpâc dodocne, miti boc mi fonâlceekac. Eme Anutuzi manahame eesâic kosa fuame miti behenzipepte numucnezo. Mâlâcjaha Judapic japelao miti fuame izihawâc miti mamana zika kâpâcwâlu ejalembij. Nâpâcnao eesâic sâc ijaha fuame muzac miti behenzapej. I Anutuzi manahuc eesâic ipucnele pezicnâpowec. Eme wamao juhuc miti manaepgopenej. Eesâic gâcne ine fuaekac. Eme moc fuame Anutuzi behecnâpome sâqolenapmu. Ilec eesâicko basanapnâpoocte numucnezo. Â mapnâpec guj fohame Satapzi sipilicnâpozacte numucnezo. Guj fohapene fic zame me homejsâko bame mutuc eegopenej. Mapkopec sâc ijaha ezo. Ilec Mâloticnezi mapnâpec wiwickeocte mâmâc numucnezo. Eme mapqâli juhapene eesâic fuame Wofuptemecne â mitilemecne â qâqâtâcnâpectemecne manasuhuc sanapkenzepenej. Elâ picziawâc dodopec â soŋapbabac ehuc nunumuzi babafic ezo. Ilec pic moctao eesâic fuame âgofâcne jazame basanapkenzepiej.

*

*

*

22) Sâqocnaonec bâhocnâpozemec.

1. **Sâqocnezi sâfâ ipucne bohôtâcnâpoekac.** Wiac gâcne ilec hândâpne sâfânehec, ilec heupene paqiqolucnâpecko bohôtasanapkeekac. Eme itilipkepene mi wahoocmu, i mezi batalazo. Eme sâqornezi sâc ijaha eekac. I ipucjaha mâc mi hockeocmu â mâc foku mi alictac eocmu. Gieo hofâ fualâ mâc mi alictac eekac. I fohuc nânâ hehâmoekac. Â zamanâzi domaku jâc fopkefâleme hâmoocmuwâc. Eme sâqocnezi qâqâtâcnâpecko bohôtaku fopkefâleme ipucjaha sâqolelâ betapkeocmu.

2. **Jesuzi sâqocnaonec batalacnâpoekac.** E ilec hâcne sambâpkonec wahalâ sâqocne talaocte hâmowec, ehuc miti bâfuawec. Eme nâpâc qâpucsâko juhapene batalacnâpowechâcne. Eme damej ila sâqocne mi hockefâlewec, gâcne fowec â gâcne damejsâc fuahuc fokac. Ilec zoangiebapasâc zîjuc numuzo: Sâqocnaonec bâhocnâpo-

zemec. Nâjâc ine mitiopâ me ɲafetiwâ ilec damej maic-keme me hucsâko enâlemesawa sâqocnenâjpecte manasulâ qâqâtâcnâjpec qaqackeocte muenjgopenej. Damej gâcnao maɲwânâj qâjkelâ juenjgopenej. Eme ɲic moc e sahac-ticne mâc hombâjsâkosâc zuleme wemocko qaqacke-oemu? E zongɲi zi sahacne bâsojkefâleocmu. Eme qâqâtâcnâjpec sâc ijaha ezacte zoaɲne zoaɲne Wofuɲ numuc-nepene zulenâlezejec. Nâjâc menâjpec peɲ me wiac moc sâfâneheczi luacneme opazisawa zulepene mi wahaocmu. I saifezi helâ zulezo. Eme maɲnâjpecte saife fokacwâc, zâjene miti â nunumu. Eme saife i mi behenzepenej. Saife izi qâqâtâcnâjpec gâbâ heme sâqocne wahame taniɲ-keocmu. Eme qâqâtâcnâjpec biankeme sâqocnele okacne wiac fuawec, busâqoc, huczâic ine gâcnewâc alictac eocmu. Zi sâqocnezi boc bâdocnâpome lolokac â huchec hati juenjgopenej.

3. Sambâjko ila sâqocne fugne fugne alictac eocmu. Mâlejko juhapene hehesic me busâqoc me huczâic alictac eejâmbâjke i mi fokac. Zila maɲkopec â sahac-kopec wiac sâqocne i fuahuc foocmu. Ilehâcne zila juju hati junante Wofuɲzi mi muekac. Eki mâlejko bâpiagnâ-polâ sambâjko lâecnâpoocte muekac. Sambâjko ila wiac sâqocne moczi fuaocte eipieocmu â wiac fokac izi lepileocte ijucjaha eipieocmu. Mâlejko zila hofâzi nânâ hehâ-moekac â wâfuzi fic qanzajneekac â hoezi hata sipilicke-ekac â huczi sahacnâjpec bâdockeekac â lepicnezi qâqâtâcnâjpec hegâpâleekac. Â sambâjko ila ine wâcwâc sâsâqole me lalaɲqajke me sisifucke ine mi fokac. Ila wiac moczi mi sulucnâpooemu â huczâic mi enâleocmu â busâqoc mi fuaocmu. Ila nânâ sâsâqole me hata sisifucke me fic zazaɲke me ɲaqi susucke mi fokac. Eme nâjâc ila fisi-nante damejsâc Wofuɲ numucnepene sâqocnaonec batalac-nâpozejec.

*

*

*

23) Go Wofuɲ fâline hâcne, go tâpili â tatamac lune, jumenzi juzokic.

I mumutepdâj. Wofuɲ fâline mocjaha jukac. E mâ-

lepsâc junâleekac. Ilec mâlepsâc wâsickepene mananâ-leocmu. Gâcnezi numucnepie japelao hazecticne lâeha gâcnezi elao mupene mi mamana, i elao mi fokac. Elâ e gâbâ micnenej ecnepene tatakicki iwâc mi fokac. Wiac e qikiñnâpome molao munzapej? Tâpililune moc mî jukac, e bucjâmbâj. Eme baticnâpoocte moc mi bititieomu me mâlepsâc wiac nâlekume alictac eme babasa iwâc alicne. Elâ e tâpililune jukacte alaj bacnehuc wâwânâj mi ecnezo. Hâmopene fupnenâjec bataniŋkeocmu, ilec mi nîkecnâpozejec. Tatamaclune elao fisinante maŋnâjec domazejec. Elao wiac biaŋne â tiŋne â tatamacne â qaŋacne â aŋacne â wamane fusumalâ fokac. Sataj eki ine dapâclune elao wiac gâgâpâcne â mamakâcne â hehesicne â âsunehec â hâhâwicne fokac. Ilec e lâpeckehuc Wofuj fâline â tâpililune â tatamaclune â jujusanaplune elao qohotahuc kiŋaj qacnenzepeñej. E juweczi juzokac. E Wofuj juju damej-ticne tatalanetâmilic â tâpili â tatamacticne fofosanaŋ.

24) Mitiopâle dâj.

1. **Opâzi Mâlole doc.** Ilec opâle fâline mi muzo. Jesuzi motecfâcne opâ mi luajalewec. E sambâŋko fehuc ziŋuc jazawec: Johane eki opâsawa luajalewec, noni ine Tilimâlo luajalepemu. Japelao Mâlazi doctâmilicko tâtâc wahawec. Nâŋâcnao ine soŋsoŋko â dockosawa wahaekac. Ilec Wofuj Jesuzi motecfâcne ziŋuc jazawec: Ijic opâ luajalehuc kikefupfâcnane bacjopanzepej. Nâŋâc opâzi pa-qiqoluc â sahaenâjecko wânâj zulepene wahame qaŋac-keekac. Eme maŋnâjec ipucjaha wânâjhec elâ i opâ omanezi wemocko zulezo? Mitipâ luapene opâzi qâqâtâcnâjec mi heekac. Opâzi mâc doc eme Mâlazi ila bâninipehuc maŋnâjecko hulâ zulebâpiaj eekac. Elâ opâ e mâc mî doc eekac. Miti â jambuj opâo zuhuckeme Mâlole doc eekac.

2. **Mâlole geje hewânegkepene maŋnâjecko huocmu.** Šaj e hândâjne fomackeocte lâlec lâlec docwiac kitâcneekac. Ipucjaha nâŋâc sâqocnele doc fupne fupne hetâcnepeñe Mâlole doc mocjaha fualâ fozejec. Maŋnâ-

gecko miti nunumu ilec tatakic â sasec, aalic, bulec wiac foha fainao Mâlozi hulâ peje, i mi fokac. Ilec qanaj miti manahuc juzo. Eme sâqocnele tatakic â majwânânte busâqoc â mitile ajac â Jesule mamanasij mapnâgecko fuame Mâlozi sâcne hulâ gieticne baocmu. Ehuc sâqocne zuleofaj elâ ejahacne tâpili â tatamac mapnâgecko bâfuaocmu. Ijicpokac tucne jaje ine Mâlole pejehae mi hezâ-weengopiej. Jaje binaj bafâlelâ miti opâ luazole qizec qaengopiej. Kosa juhuc luapene fâlitâmilic ezacte manabâc mi eengopenej. Binaj bapazisawa mi sâckeocmu. Moc e binaj micbipiczi baocmu, e Mâlozi liliocmu. Eme miti opazi fâlitâmilic eocmu. Mitizi mapnâgecko hulâ foha opâ luapene Mâlozi sâcne iqicnâpocmu.

3. Opâ luahuc Mâlohec epene fugne tâtâc tanigkeocmu. Mâlozi tâtâc wawaha ine Jesule motecfâc jajelaosawa wahawec. Â motec jaje ijicpokac opâ luajalepie jajelao sojsoj wahawec. Wahame fugne sojsojko mi fowec. Manjenicko hulâ baafecjopame jaje gae nunumu â mumutej â miti mumu ine manjenickonec opâsâloc igucne wefuwec. Elâ jujujenicko fugnewâc tanigkewec. Jajelao miti nunumu ilec ajac â zeli elâ miclelej â jâuj â ââgo juju fuawec. Nâpâcnao miti fuame ijicpokac micne bahuc mitiopâ luapie sâc ijaha fuawec. Eme zâhec luambenj nâpâcnao Mâlole fugne igucjaha tanigkewec me mâcne? Ijicpokac bocjaha mitiopâ lulua juwicnao jumbij sâc ijaha fainao juengopiej. Lualâ fug moc elâ juju mâcne, lualâ mitile aafecke mâcne, lualâ tijne â ulucne juju mâcne. I Mâlozi jajele majko huocte qujkewecte manjenic qâjqânjaha fokac. Jaje sâqocnele mapqâzic mi unuckembij ilec. Eme ijic igucnezi jajacnele mi mumu miti musâqolehuc muengopiej: I fâlitâmilic. Mâlozi mapnâgecko hulâ mapnâpec bâqâleme afeckelâ zoqahec elâ juzo. Eme moc e opâ lualâ fainao iguc jume muzu: Mitiopåle fâline elao fuakac. Moc e miti â Jesule mamanasij mapnao bocjaha focmu ele majko Mâlozi tâpili bocjaha bâfuaocmu, moc e afecne focneme Mâlozi igucjaha mapnao tâpili afecne bâfuaocmu.

4. Wofug manasigkehuc miti opâ luazo. Elâ-

wâc miti manazakiehuc luazo. Ilec dân kecziñuc mukicne: Mamanasiñhec opâ luanĩmu jaje sambânte biñe enĩmu, mamanasĩtâmilic jaje hâlâcte biñe enĩmu. Wofuñ e opâ-lulualesawa mi locnâpooemu. Miti mañnâñecko hulâ foha manasiñkepene locnâpooemu. Itâmilic locnâpoocte quñ-keocmu. Sahaczisawa miti bajupene mi locnâpooemu. Mañnâñec ele eme biankenante enâleme sâcne locnâpolâ zulebâpiañ enâleocmu. Nâñac ine mitiopâle manapene ñosatinac eekac. Motec ñosao lâccjopanante keci lãñgeñe, keci ulucne muhuc mi bâtâc bacjopa jumbeneñ. Me motec keczi piticnele mâc juzejec mupene mamacnezi nole motec zâgu mi juzejec muhuc kimbeñ aalic bâfuame mujumbe-ñeñ: Mulâ sifu âgofâcne japelao zuhuckezejec. Eme mitiopâle sâc ijaha eengopeneñ. Soñañ moczi muocmu: Nole haeoneczi zâhec mi enzepieñ. Â babafic moczi muocmu: Miti opâ sakalejalepene lãñgeñkenzĩpiñte sifu luajalezo. Wiac wenĩucnezi lãñgeñkeengopieñ? Mititâmilic jaje-hâcne. Eme iñucnezi mitiopâ luapie sâckeocmu me? Moc e miti sahaczisawa bajuocmu, e mitiopâ iñucjaha sahaczisawa luaocmu.

5. Miti opâ luahuc mahec eengopeneñ. Anutu mamac â motec â Mâlo ele zâñezi fainâñecko feekac. Nâñac wiac moc lutâmilic fome muc zâfickehuc me zâñe-nâñec qâleñkehuc sakaleengopeneñ. Eme Wofuñzi sâc ijaha enâleekac. E miti opâzi zulecnâpohuc zâñeticne qâ-qâtâcnâñecko qâleñkeekac. Ehuc sakalecnâpoekac. Bâbâ-fuanâñeczi laucnâpoekac â bâbâpiañnâñeczi laucnâpoekac â ñeñgocñesiñnâñeczi laucnâpoekac. Eme nâñac Wofuñte mahec embeg ilec mi nĩkecnâpozejec. Eesâic moc fuame no Wofuñte mahec epo muhuc qikiñnezo. Wofuñte zâñe-qâleñ mañnâñecko sifuckeme lutâmilic epene sâqocnelu-nezi sakalecnâpooemu. Manâñec honelâ ine jaje lujepichec muhuc behecnâpooemu. Wofuñte zâñeqâleñhec juku hâmpene locnâpooemu. Sâqocne bahuc hetâmilepene ine zâñelulupñâpooemu.

6. Miti opâ lualâ etalakopac mi muzo. Fuyke-kopac iñuc muzo. Miti opâ luahuc qâlicne fuaengopeneñ, sahaczi mâcne, mañzi. Sahaczi fufua i mâlâcjaha fuambeñ.

Fualâ dameņzolâ sokahuc juku sokatalamben. Eme maņ-nâņeczi iņucjaha sokahuc juzejec. Sahaczi sosoka ine ilec dameņ talame mocwâc mi sokahuc, juengopenenșâc julanaņmu. Â maņzi ine iņuc mi ezo. Maņnâņeczi sokahuc jukuha hâmonzepenen. Ilechâcne miti opâ lualâ sokatalakopac mi muzo. Mâc miti binaņ wezimuc manapâlâckelâ miti manafâlekopac muhuc qâoma mi ezo. Mâlo e maņ-nâņecko miti fokacsâc huocmu. Eme opâ lualâ miti manalahuc jupene maņnâņecko kime kiņ ehuc fuazejec. Eme Mâlo iņucjaha maņnâņecko huhuc fozejec, ehuc gie fuņkewec i nâņâcnao baku batalazejec. Opâ lualâ miti manalahuc juzo, ilechâcne Wofuņzi motecfâcne ziņuc jazawec: Ijic opâ luapie dân ŋazaekopac i qazujalepie leņkenzepien. Nâņâc opâ lulua juwicnaosawa miti manazo, iņuc mupene sâqoleekac. Fainao iņucjaha manahuc ilec giene bahuc fâline bâfuazo. Miti mâc mamasasawa mi manazo. Manahuc leņkezo. Wofuņ e leleņkele muwec. Miti e mamasasawa manahuc sâcne mi bajuzo. Leņkehuc fâline bâfualâ sâcne bajuzo. Nâņâc ŋic moc kisenâņec bajuocle lâcnenanaņmu. Eme eki mâc kiseficko guluckelâ qâoma ehuc jume kise ŋeku sâqoleocmu. Â dameņsâc lo gieo salamamac ehuc jume sâcne fonâleocmu. Miti opâ lualâ sâc ijaha ezo. Â miti opâ lualâ ine la sosonke â miti nunumu hehetala â sasac, lângeņne heheqâlê i mo mâsi? I ehuc Mâlo jâpezo â mitiopâle fâline sipilickezo â mahesifuckezo. Eme mi luakicnetinac maņqâpuc elâ juzo.

7. Nalumotec jaje Jesule biņefâc enzepienwâc.

Jaje wenijuc lutâmilic eniņmu? Ilec jaje Jesule biņe qapene junzepien. Ehuc mitiopâ luahuc mahec enzepien. Jaje fuaengopien i maņqaqachec mâcne, maņgâgâpâchec fuaengopien. Nengoc mamaczi maņqaqachec jupene muzac jaje sâc ijaha fuanzapiņ. Maņqaqachec ine mocjahazi fuawec, Jesuhâcne. Eme nalumotecfâcnâņec maņgâgâpâc fuaengopiente Wofuņte maņfuņko lâccjopapene mitiopâtic-nezi zuleqaqackezejec. Eme Mâlozi jajele maņko hulâ gieticne fuņkezejec.

8. Nengoc mamaczi jajelao gie bahapene miti-opâzi fâlinehec eocmu. Ijic moczi hâmu moc salalâ

behelâ qâoma ehuc jume uupiczi behâmooemu. Nalumotec jajele fune ijaha fokac. I qâoma ejalepene miti opâ mi luakicne hawali elâ junimû. Elâ sokalâ sâqocne fune fune bâfuahuc miti sipilickepie juku mâlejnâjecko weni jajezi miti bajunzongopien? Nâjâc eemasangiele muen-gopenen, gie ihâcne qiefâcnâjec jajelao banzepenen. Jajele elâ gafeo â uupicte numuzo. Mapmamanasujepic piticne fuame gae nunumu bembeyne qazujalezo elâ jajeh-hec mâmâc numuhuc focfahalec ezo. Â Jesule biye embij i jazahuc juzo. Iyuc ejalehapene Mâlozi manjiejicko sâcne nepejuju eocmu. Eme jaje Wofun manasiqkehuc sokanijmu. Nâjâcnao ine gie i mozi baekac? Nâje nâjâcne qâomaehuc nalumotec jajele mâmâc eengopenen. (Qâoma qizecne ine jokac jajelao fokac. Jajehâcne nalumotec jajelao mitigie banijte mujalekicne. I bahapie piczi baficjopazo. Ehuc pic â jokac miti hatao juzo. Nâjâc ine miti nunumule qâoma epene nalumotec jaje igucjaha qâoma enijmu. Zâgefaijejicko hehesic epene hehesicjaha enijmu. Eku Wofunte biye ekicnezi hâlâcte biye enijmu.

25) Jafetiwâle dân.

1. **Wofunte melâfâc.** Mitio zîyuc mukicne: Wofun-nâjec e Judazi doc bawec gafe ila motecfâcticne gafetiwâ gumecjopawec. Eme gae nunumu elâ Gezemanê jufuo la juha Judazi doc bame lombij. Elâ hae fuleme gambij. Ilehâcne gafetiwâle Wofunte melâfâc mûzo. Ijic hâmpie melâfâcjepic omanezi mi bajunimû, funfunfâcjepic jajesawa bajunimû. Eme Wofun e igucjaha melâfâcticne manfunnao jumbij jajesawa jalêwec. Mitile pic kosa hefâlecjopawec, mitiopâ ine miti â mamasasiqheç ekicnezi luanijte muwec â gafetiwâ ine kikefunfâcticne jaje nâpie sâckeocmu. Melâfâcticne i omanê â kosanezi sâcne mi bajunimû.

2. **Wiac sogne i poloy â waiyzi foykewec.** Poloy â waiy i wiac omanê, ilec fâline mi mûzo. Elâ i zâjezi hohonene â mezi bapane â miczi nânâne. Wofunte biuc â soc izi ine zâjezi mi hohonene, mezi mi bapane,

miczi mi nânâne. Ilec wemocko mâc sicnejalehuc ziguc muzac: Lo nânij. Motec jaje basahuc lonijte eipienzapij. Ilecâcne polojko â waijko zuhuckelâ jalewec. Jesule ziguc mi muzo: Biuc â soc bajewec i gumecjopawec. Wiac i hohonene, i jalezo mulâ fojtâmilic jalezac. Elâ izi nânâ omane ezac. Jesuzi biuc â socticne 'gumecjopawec i mâlej sahacticnele mâcne, i sambâjsahacticnele biuc â soc. Eme zâjezi mi hohonele polojko â waijko zuhuc-kewec.

3. **Qâqâtâcnâpecte tiwâ lâewec.** Sahacnâpecte mâcne. Ilec lâezo mulâwâc lâezac. E ȡicȡokac bocjaha-jâmbânzi elao miti manahuc juku nânâle hâmpie nânâ qowi bâfuajalelâ gumecjopawec. Â hâmozo ehuc ine motecfâcne tiwâ omane bâfuajaleme muzac i nâpie biac alic-tac ezac. Eme zâheci juwaleengopeneyzi mâc junzapej. Wiac omane i sisilowene â oma eene, sambâjpkonec wiac i ine sisilowene â oma eenetâmilc. I qâqâtâcnâpectesâc. Eme qâqâtâcnâpec wemocko tiwâ omane gumezo? Ilec-hâcne qâqâtâcnâpectzi nânâ basahuc dockesâqolec ezacte Wofupzi ilec tiwâ bâfuawec. Eme i qâqâtâcnâpec gume-pene biapkêlâ jujusanaphec ezejec. Ilec qâqâtâcnâpec tiwâ lepicne hâlâckonec i mi gumenzepenej. Moc e sahacticne wiac umbey â ukicnehec gumeme huczâicsâko fuacneoc-mu. Eme moc e qâqâtâcticne wiac kosa gumeme ipucjaha zâhec zâicsâko fuaocmu. Ilec Wofupzi qâqâtâcte tiwâ lâenâlewec manapene fulisâko ezejec. Eme damejsâc nâ-huc lune mutenkenzepenej.

4. **Ȧfetiwâ i hâmocticnele fâline.** Ilec kecziguc muhuc lâewec: Ȧojele due bahuc lâekopac, ȡojele due bahuc qikiȡnekopac. Sahackopec wiac sasawa i miczi mume fufuane. Â Wofup e mâlejko juhuc ȡic sahackopec baficjopaocte ipucjaha miczi mume fâline fua jujec. Tiȡtup â qepoj â nâȡup â pulij i miczi mume biapkembij. Elâ miczi mume opâzi waij ewec â qowi bocjaha tumapȡepie lombij. Qâqâtâckopec wiac i maname miczi mume fufuane mi ewec. Ilecâcne sambâj behelâ mâlejko waha juhuc gie bawec â zâic manawec â hâmowec. Ehuc tiwâ fup moc bâfuanâlewec, ejahacne fâli â sochâcne. Eme i nâpene ju-

juticnele tâpili nâjâcnao fotâcneocmu. Mâlâcjaha nîc jaje momoli enîte jopakicne jajele utu gigilic nâjumbien. I bâbâsîfuc. Â Wofujnâjêc eki jâmbomac nâjâcnele elâ jujuticne qikiñneme jujusanapte nânâ fuanâlewec. Eme ñafetiwâ i Wofujnâjêczi sahacticne qaisockehuc bâfuanâlewecte manapene omane mi ezejec, manapene gemâcne ezejec, manapene fulisâko ezejec. Wofuj e manjauyticne mo ipucnele sâqocne bapa nâjâcnele ipuc ewec.

5. **Zâzâfic qâlicnele soc.** Mâlâcjaha Anutuzi Judajic jajehec zâzâfic ewec. Aigita mâlenko âgo ejaleocte lama soczi ficmotâcjêc likembij. Elâwâc Sinai tikio jajehec zâzâfic eocte Judajic jaje bulimakao hezulikec epie Mosezi ilec soc tieme luajalewec. Ehuc qowisocte manapie fulisâko ewec. Eme ilec zâzâfic lanqanele fâline mi muzo. I mâc sâsâc ekicne. Elâ i Judajic jajehecsawa zâzâfic ekicne â mâlen gâcnao julamben i Satanzî zâfic-nâpowec. Zâzâfic fâline ine Jesule socte fuawec. Ilec zîjuc muwec: Keczi zâzâfic qâlicnele soc, i kiñ talaocte qikiñnepemu. Wofuj e âgo bacnâpoocte kiñko quñkewec. Eme i talaocte jujuticne qikiñnewec. Nâjâcne due bahuc hâmome kiñ talawec. Eme kiñ talawecko nâjâcnehec sâcne zâzâfic eocmu. Ilec socticnele zîjuc muzo: I kiñ babatala soc â sâqocne qaqa soc. Eme dameñsâc ehêc zâzâfic enajtehâcne socticne lâenâlewec. I nâhuc ehêc man mocjaha elâ juzo.

6. **Ele manasuhuc ñafetiwâ nâzo.** Zîjuc mi muwec: No qâoma enalehuc nâzo, me no lâpecnuhuc nâzo, me nole nîkecñopaha nâzo. Alicne, man mamanasunâjêc elea foha nânzepenên. Kosa juhuc fisilâ mâc sahaczi nânâ mâcne, me manzi Wofuj qaisockehuc nânâ mâcne, me miti sipilickelâ heheson â bulehec fisilâ nânâ mâcne, nakac nâpe ehuc nânâ mâcne, tiwâ ilec hâmohuc â man mamanasunâjêc elea domahame fisilâ nanapte muwec. Mâlâcjaha posale ekicne ipuc mi ezo. I wama fuaocte sâqocne mâc bâlâlielâ zâhec posa oma eme mocwâc heqâlefâle jumbien. Dâfetiwâ i tiwâ bâzi omane nâengopenên ipuc mi nâzo. Opâ mi lulua, paqiqoluc mi gugule, wânâñhec â sahacâsuhec â qâlâcheç â micbipic

huc luacnefâlekicne, ijuc mi fisizo. Tiwâlune e sambây wofunysâko, ilec e alaŋ bacnehuc sahac â maŋ emasankelâ fisi nâzo. Elâ tiwâ i biankelâ elea enaŋte Wofunzi lâenâlewec, ilec e manasiŋkehuc juku nâzo â nâlâ ijucjaha e manasiŋkehuc juzo. Buafecticnele manasuhuc nâzo, zâicticnele manasuhuc nâzo, hâmocticnele manasuhuc nâzo. Nâlâ lâpeckenâŋte mâcne, nâlâ ehec bâbândeŋ sanayne elâ junâŋte nâzo.

26) Sambâyte ki.

1. **Sâqocne mumufua.** Ȧic moc e hetai gemâcnezi kihâmome âgofâcne jazame jâoclonijmu. Â moc e maname afecne eme sâcne bajukopac mume mi jâoclozo. Sâqocnele fune ijucjaha fokac. Moc e hehesicticnele â kipticnele maname afecne eme bajuzo mume Wofunzi jâiŋko mi jâocloocmu. Â moc e maname gemâckeme mufualâ Wofuntao mume jâocloocmu. Nâŋâc ine sâqocne tâtâc fufua i basalâ muengopeneŋ: Wemo eekopac, mâc juekopac. Zoanne zoanne maŋzi, zâŋezi, miczi bahac bâfuaengopeneŋ, ilec manapene lacne eekac. Wiac izihâcne maŋnâŋec gâbâ hegâpâleekac. Nâŋâc zoanne zoanne maŋnâŋecko fiene hume wiac ilec fune manatalanzapeŋ. Ehuc maŋnâŋec zoanne zoanne emasankenzapeŋ. Nâŋâc ine Ȧafetiwâle dameŋ maickemesawa bulec bulec emasankeengopeneŋ. Eme ilec hehesicnâŋecte manapene mi gemâckeekac. Qâoma ehuc ilec fune sâcne mi manaengopeneŋhâcne ine. Eme ilec tucnezi sâqocne mufuahuc jaŋacne maŋ mi qolickehuc gâcne qolicjopaengopieŋ. Motec qâso-
liekicnezi ijuc mi ewec.

Nâŋâcnao bocjahazi sâqocnele manapie tatakiecne mi eekac. Alicne, jaŋe manapie aŋacne eme hesonkelâ bajuengopieŋ. A gâcne jaŋe funnenâŋec tanikeme Ȧic Ȧokac jajele maio mimienajmu, muhuc bahacjepic hefackeengopieŋ. Â tucne jaŋe sâqocne mufuapene Ȧic Ȧokac jaje nâŋele manapie wawahane ezac muhuc bulec elâ mickeengopieŋ. Gâcnezi ine sâqocne tucne hefackehuc tucne-

sawa muenngopieŋ. Ehuc sâqocne fâline bakicne i heson-kehuc zîŋuc muenngopieŋ: Maŋzi sasecsawa ekicne. Kec-igucnezi sasawa Anutu alap mi bacneengopieŋ â sâqocnele manapie hâhâwicne mi eekac â qâqâtâc sisipilic ilec manapie mi pemâckeekac. Moc e sâqocnele kibusâqoc bâfualâ ine ilec me ilec mi muocmu. Mâc sâqocnezi qâqâtâcticne bâpulîŋkezacte hâhâwic manahuc ŋic jape-lao-mecne â Wofuŋtaomecne fodapelâ mufuafâleme kiŋticne alitac eme bubiaŋ elâ juocmu. Kecilec mumufua fâline mûzo. Â jâiŋko mumufua â busâqoctâmilic mumufua i lacne.

2. Mumutâmile. Mâlâcjaha Wofuŋzi tâtâc juhame ŋic elao fisipie ejahac sâqocnejeŋic mutâmilejale jujec. Izi juku sambâŋko feocte gie i motecfâcne mujalehuc kec-zîŋuc jazawec: Ijone ŋic sâqocnejeŋic mutâmilepie tâmile-jalezejec. Iguc mulâ Mâlole biŋe mâmâc qajalewec. Mâlôtâmilic juhuc gie i bâsifuckezo. Ehuc bulec â heheson bajueŋgopieŋ japele sâqocne mutâmilezo â muafeckezo. Â sâqocnele tatakic â hâhâwic bajueŋgopieŋ jape mumâmâc ejalezo. Nâŋâc iŋuchâcne eengopeney, ehuc gokizia sâqocne me, nâŋâc mâmâc hehesic iguc muhuc sâqocnejeŋic musomiejaleengopeney â mufuahuc busâqoc manaengopieŋ jape wiac pemâcne ejaleengopeney. I Mâlôtâmilicte iguc eengopeney. Ilec Mâlohed elâ gie i bazo. Sâqocne i mâleŋko juhapene talaocte mukicne. Wiac weniguc sambâŋko moc bafezo? Ilechâcne qaqazu jape Wofuŋ miczi sâqocne mutâmilênâleengopieŋ. Eme moc e jâmbomac hehesicticnele maname sâqoleme mumutâmile dâŋ manazakiezejec. Ehuc Wofuŋzi kiŋnane behekaç muhuc bune biaŋkezejec. Â moc e sâqocnele apac â bulec bajuocmuzi ine mumutâmilic dâŋ mâc fiuc lome elao fâlitâmilic eocmu. Igucnezi kiŋ focneha hâpohuc juhame dameŋticne talazacte hâwickezejec. Wofuŋzi ine sâqocne bâtâmilênâleme juju moc junzopeney. Elâ dameŋsâc biaŋkeku biaŋkehâmonzopeney.

